

MISHIMA YALAJIKA



Twayai tulombe.

Nkambo, pano twaketekela. Twaketekela mu Mwaana wakwa Lesa, kabiji, kupichila mukikye, twayitaba Bumi bwa Peenape kupichila Mwiaye. Pano twapwila pamo jibiji, munte uno, nangwa ano mabaanga, namambo akupwila kukwabo, twaketekela Anweba namambo a Kyambo kabiji pa byo musakwitubuula Anweba bufuku buno. Twimuketekela Anweba, Nkambo, kabiji tubena kupembelela pe Anweba. Kabiji mwaamba mba, “Abo bapembelela pe Nkambo bakavwikwa bulume; bakapewa byapi nobe bampungu.” Kabiji twalomba, Lesa, Anweba mwitupe Bulume bwakuvwikwa-nabo, bufuku buno, byo tubena kupembelela pe Anweba.

² Twimusachila Anweba na mambo ababo bantu, kabiji ne kilumbululo kyabo Kwi Anweba ne byo balumbulula kwi amiwa. Nemusachila Anweba pa kikye, Taata. Abo ke bunoshi Bwenu. Kabiji Nalomba namba, Lesa, amba bufuku buno, amba musakwimweshwa Anwebabene mujishinda, kwi abo, na kyo babena kukabila. Umvwe muji wakolwa muno, abo batambule lubuko. Umvwe mujipo luzhinauko mu milanguluko ya muntu umo, lufumyaimo, Nkambo. Kabiji tupai Kyeenyi Kyenu ne mapesho Enu, mambo twiakabila, Nkambo. Anweba yenu kufikilamo-kwetu konse. Kabiji, kwakubula Anweba, kechi twakonsha kuubapo nangwa kintu kimo ne.

³ Twalomba mba Anweba musakutambula lusachilo lwetu pa byonse byo Mwauba. Mu Jizhina ja Yesu Kilishitu tubena kupembelela mapesho Enu. Amena.

Ikalayiko.

⁴ Kabiji, kyawama, kwaikala kwa—kwa talalako bufuku buno bwa pa Mulungu, muno, kukila byokyajinga bufuku pa Mulungu wapita. Twakila bingi kusata ku balongo betu abo bayingijile na bukishika pakuuba mba akye kikaleko. Nayuka babiji nangwa basatu ba mwiabo. Mulongo Mike Egan, byo Mbena kumona akwa kunyuma, kabiji Na... Mulongo Mike, ne Mulongo Sothmann, Mulongo (Naketekela) Roy Roberson, ne Mulongo Wood, kabiji ne bonse mulwabo, bajinga kuno nakumanama, kweseka kubikamo bibye pa kuuba mba twikale na ino Mbila pa kino kimye, nangwa mba leelo. Nanchi, twasata bingi.

⁵ Bino, Pamulungu ubena kwiya lukeelo, inge Nkambo waswa, Nakeba kwikala na mpwijilo yakulombelela bakolwa. Kabiji tukekupana ku kulombelela bakolwa, inge Nkambo waswa.

⁶ Najikumona, lukeelo luno, paji mulumba wa tutambala papo. Najikwitulombelela. Kabiji Ami, kimye kyo

mwajikulombanga ne kwimba, Najikulombelelanga tutambala; kabiji paji ne tukwabo twavula bufuku buno. Nanchi, atweba— atweba twaketekela mba Lesa ubuka bakolwa. Nanchi kuji lushimuno lukatampe bingi lwa lubuko mukachi ketu, kabiji ne kuzhookoloka ntanda yonse, kabiji twasata bingi pa kikye.

⁷ Kabiji Nalanguluka, Mulungu ubena kwiiya, byokiji mba Kafumapo pacheche, kabiji twakutwajijila kyabaya bingi na kufunjishatu kabiji ne Mbila, kabiji Nalangulukile namba kyakonsha kwikala kintu kyawama bingi inge twaikala na—na mpwijilo ya lubuko, kulombelela bakolwa. Kabiji twaketekela amba Lesa uketupa kimye kyawama bingi.

⁸ Bino, bavula ba mwianweba musakwendeshanga kuya palepa ma mailoshi avula bufuku buno. Nanchi Najikwaambanga ku mabuumba ku—ku Blue Boar Cafeteria, leelo, ko Najinga nakuja kajo kamulajilo. Bavula bantu bawama, Nebemuna mu maboko abo ne kwisamba nabo, bantu bo Nakibula kusambakanapo, abo beya kuno ku kipwilo. Kabiji Nasachila bingi batemwe bayewa musango, kabiji Nakeba kwimusachila anweba bonse. Bamo basenda malubenyi afituluka, ne kwituletela atweba. Kabiji umo wituletela mbekete ya muzungwe, nangwa meema afuma kumyenge atobala, Naketekela byo kyajinga, kabiji—kabiji ne bintutu bikwabo. Anweba kechi mwayuka akya byo kyalumbulula ne. Kabiji ne mu lukeelo, Najikwiya na lupukamo munzubu, kimye kimo kuji . . .

⁹ Lukeelo lumo kwajinga mulongo umo ao wakatazhiwe bingi, kechi wajinga na bya kuvwaala nebintutu bikwabo ne, wakebelenga amba amiwa ngye na kumukebela bya kuvwaala. Natatwile kuya, kabiji Amiwa nashi nketetule mu mbekete ya malubenyi afituluka yaikele byobya. Naambile namba, “Bushe mwajikuleta malubenyi afituluka nyi?”

¹⁰ Kabiji aye waambile mba, “Ine, kechi jipo nakintu kyakuuba na kyokyo ne. Najikwikala pano juba saka jikyanyge kunsama ne, kabiji abo baikele kuno nanchi.” Kabiji kyajinga wawama Mulongo Ruddell ye wialetele kwi amiwa. Kabiji, nanchi, abyo bintu kine ne Bisachila.

¹¹ Billy Paul wajinkumbuula, kimye kicheche kyapitapo, amba mu kino kipwilo bufuku buno, bajikupishamo bupe, amba bwami. Ne—Ne musachila pa kikye. Amiwa kechi najikukebanga anweba mba mube kikye ne. Na—Nasachila ngubilo yenu, ne bikwabotu, bino akye kechi kyajikukebewanga ne. Kabiji, bino, Nkambo emupeshe. Mwayukatu, mwayukatu, Baibolo waamba mba, “Monka momwikyubila ku umo wamuheche wamubabo, mwikyuba kwi Amiwa.”

¹² Pano, Najikwambanga kwianweba, pa Mbila, yaolokatu. Kabiji Na . . . Bamo bantu bakonsha kulanguluka amba—amba Ndanguluka mba Yesu ukeya lukeelo nangwa bufuku. Amiwa

byonguba. Bino, kechi Naamba mba Aye byo akooba ne. Kabiji, ne jikwabo, Aye kape kechi wakosha kwiya mulungu wiya ne, kabiji kape mwaka ubena kwiya, kyakonsha kwikala myaka teeni. Amiwa kechi nayuka kimye kyo Akeya ne. Bino, kujipo kintu kimo kyo Nakeba kuuba... kimye kyonse kibikayi mumilanguluko, mwikale benengezha mineti yense nangwa awala. Mwamona? Kyakuuba mba, inge Aye wabula kwiya leelo, Wakonsha kwiya keesha. Nanchi lamayitu kyokyo mumilanguluko yenu, amba Aye ubena kwiiya.

¹³ Kabiji kechi Nayuka kimye kikekala awala wami wapelako kwikala panopantanda ne, kafwako nangwatu umo wayuka mwiatweba ne. Kabiji kafwako nangwa umo mwiatweba wayuka kimye Aye kyo abena kwiiya ne. Neaye kechi wayuka ne, Ayemwine, mwayila Byambo Byanji Mwine; Aye waambile mba, “Ba Taata, bunke bwabotu, boobayuka kimye Aye kyo akeya; nangwatu Mwaana kechi wayuka Aye kimye kyo akeya ne.” Ke kimye akyo Lesa kyo akamutuma Aye jibiji. Bino tubena kupembelela Kwiiya Kwanji. Kabiji inge kechi ukeya mu kisemi kyami ne, Aye ukeya mu kyalondelapo; inge Aye kechi wayiya mukyokya ne, Ukeya mu kyalondelapo. Bino, amiwa mwine, kechi Namonapo kimye kyakishalako ne. Naubatu... Kwiamiwa, kyakonsha kumweka mu mineti uji yense. Pano, akyo kechi kyalumbulula... Akyo kechi kyalumbulula, bino, amba mukamona meulu kwaluka kabiji ne byonsetu... Ako kechi ko Kwiiya ko Mbena kwaambapo ne. Mbena kwamba na mambo Akushikulwa.

¹⁴ Monai, Aye unji Nakwiiya kusatu. Aye ukeya mumazhina abwaana busatu. Aye wayiya mubusatu: Taata, Mwaana, Mupashi Wazhila. Monai, mu byonse bye ye umotu Kilishitu, Lesa umotu, kimye kyonse. Pano, twayuka mba Aye wayishile mu kuleta nyingijilo ya lusa isatu: kulingishiwa, kutokeshiwa, lubatizhilo lwa Mupashi Wazhila. Bintu byonse, mwi Lesa, bipwijijika mu bisatu bisatu.

¹⁵ Kabiji nanchi Aye wayishile, patanshitu, na kukuula Musongwa Wanji. Aye wayiya, jabubiji, ke Kushikulwa, mukusenda Musongwa Wanji. Aye ukeya, jabusatu, na Musongwa Wanji, Mfumu ne Mukamfumu; pakupita, akyo kyo kimye bantu bavula po babena kuketekela Kwiiya.

Pano umvwe Aye wayiya mu kikye kimye, kafwako nangwa umo ukamumona ne kanatu bonka beenengezha bobakayuka kimye Aye kyo akeya. Kukekalatu kubula kwibamona bantu. Abo kechi bakayuka ne kibamwekela ne. Abo bakasendwatu, mu kakimye, kabiji bakamonatu baleka kumweka. “Kwalulwatu mu kakimye kachechetu, pamo na kukopa kwa jiso.” Nanchi inengezhaitu na kyokyo. Kikekala kyatama lukeelo lumo pa kumona mutemwe wazhimang’anatu, kafwako nangwa umo wakwibamona ne. Kechi kyakonsha kwikala kyatama bingi

pa kuyuka amba kyapita kabiji washalapo? Nanchi ilamaitu kumeso a Lesa.

¹⁶ Pano, mulungu ubena kwiiya, inge Nkambo waswa, pa Kimo kibena kwiiya, mulungu wakufuma pa kikye Kimo, inge Nkambo waswa, Amiwa mbena kubwezha kisemi ku Arizona kobaya ku sukuulu, nanchi Ami—Ami po nkabwela.

¹⁷ Bino, Amiwa kechi ngya kookwa...Amiwa kechi njipo nampwijilo ya kuyako ne. Amiwa kechi ngikala ku Arizona ne. Ngya kutu kungi. Twaalatu bakazhi, pa Kimo kyalondelapo. Nkabwela kuno jibiji. Kafumina kuno pa kuya ku British Columbia. Nkabwela ku Calorodo. Nkekala ku Arizona jibiji kimye kimo peepi na Kimishimishi, nanchi ke mamineti acheche, palepako ke...kapepo moba abiji nangwa asatu, kusenda kisemi pamo, kubwela kuno kimye kya kukokoloka kwa Kimishimishi, inge Nkambo waswa, kwikala na mpwijilo mu mulungu yense wamumwaka mupya.

¹⁸ Nanchi Amiwa njikuno, kulondelatu, bimye byavula. Amiwa njikuno bimye teeni kukilapo byo ngikala kookwa, mambo kechi tujipo na kipwilo nangwa mpwijilo iji yonse kookwa ne, kafwako kyotwikala naky kookwa ne, nanchi, mwayila mpwijilo ya bipwilo. Akyo kyo kintutu kimo kyatamako. Amiwa kechi njipo na kifulo kwa kutima baana amba bomvwe iye Mbila ne, nobe baana benu byo beyumvwa kuno, kabiji—kabiji nanchi alo lolukatazho lotunjinalo. Bino banji na bumi bwakila kuwamisha. Kwaa uminina, kwaakaba, mwela wauminina, bino bonse baana bamwekatu ba bumi bwakila kuwamisha. Amiwa kechi mbandishako kyakuuba mba ngyuke kana kwawama nangwa kechi kwawama ne. Amiwa, Ngikalatu wakwendauka, kabiji Na—Na—Naketekela Nasemekelwetu wa kwendauka.

¹⁹ Bakazhi bami bantela mba...Nayuka uji muno, nanchi Nsawkamba kikye pa kupwisha kupwila, mwayukatu. Akye kitelwa mbaka, lubesha usupauka, nangwa mba lubesha lutwajijilatu na kupumpa, nangwa monse—monse, mwayukatu, busenga bubula kwikala pamo? Nangwa, Amiwa kimye kyonse nji pakwenda, mu byambo bikwabo. Kabiji pano Naikala mu masongola, myaka tweeti-tuu, kabiji Amiwa, bimye bimo, Ndanguluka mba jitu pamo nobe ne Mwenyi panzubo, mambo Ngyatu na kwendauka.

Bino Mbena kupembelela kimye kyo tukekala pamo mu Ntanda yetu juba jimo. Pakuuba pa kino kimye nkondo koikiji, nanchi twayita twikale mu milombelo.

²⁰ Kechi mulubeko ne, lukeelo Mulungu wiya, inge Nkambo waswa, mukaleta bakolwa benu ne bamanyikwa. Mukeye bukiji, mwamona pa kwikala, kabiji kape kuji jibumba ja kulombelela. Tukapana bitupa bya milombelo. Inge kechi kukekala bavula ne, kechi tukapana bitupa bya milombelo ne, bakwesankanatu kulenga mulaini mucheche nobe ibiji nangwa madazeni asatu,

ngangwatu kintukimo. Bino atweba—atweba kape tukapana bitupa bya milombelo, nanchi kape tukeyuba peepi nobe awala umo kupwila kwine kasa kukyanye kutatula, kyo Naketekela mba kisendatu. . . Kikekala eiti, eiti nangwa eiti-sate, bakapana bitupa bya milombelo; bashinkula kipwilo, bapana bitupa bya milombelo Mulungu wiya lukeelo. Kabiji mukamone mba muji kuno nakutambula. . . Mukalete batemwe benu, mukebabike kukwe. Mukekala mwawama ne kutalala mukachi ka kipwilo, inge bakolwa, kabiji tukoba kiji kyonse pakuuba mba twibalombelela.

21 Nemusachila anweba, ne jikwabo, pa bupe bwa butemwe.

22 Kabiji pano tusa kutanga bya mu Kyambo kya Lesa, bufuku bunu, kabiji mwinengezhe pa kikye kibena kubiwa kya kwiiya Kyeenyi Kyanji mu kwituletela atweba Kyambo Kyanji. Pano, twayuka mba twakonsha kutanga kibaaba, bino Lesa ye wakonsha kusolola kishina. Mwamona? Twakonsha kutola kibaaba, bino Lesa ye wakonsha kusolola kishina. Kabiji pano byo mubena kuzhikula mu Buuku wa Yelemiya, kyapitala kyabu 2. . .

23 Nasaka kwaamba mba Njina lusekelo lwa kutanwa, ne atweba, Mulongo Lee Vayle, mulongo wawama bingi mwi Nkambo. Kabiji Nalanguluka kuno, mulongo kukwe, kechi Nakonsha kuvuluka jizhina janji ne, Mulongo Willard Crase. Kabiji Namona balongo bafuma ku Arkansas, Mulongo Yoano ne bakwabo, bafuma ku Poplar Bluff, ne Mulongo Blair. Kabiji, oo, Mulongo Jackson, ne Mulongo Ruddell, kabiji bavula bingi kyakuba mba Amiwa—Amiwa kechi. . . Kyakonsha kuwama inge Nakonsha kuteela uji yense pa jizhina, bino kuuba ne kyuba ne, kabiji anweba mwayuka. Mulongo Ben Bryant, Namumona saka aikala muno; aye kimye kyonse ke koona wami wa amena mukimye kyo Mbena. . . Muntu yense wayuka Ben kupichila mujiwi janji. Uu-uu.

24 Atweba, saka tuji mu California kimye kimo, Nasapwijilenga Mbila ya bantu baki Baptist akwa ku kipachiko. Bajinga na tente mukatampe kokwa, kabiji ne bavulamo ke ba Baptist babinemanga. Amiwa kechi naumvwinepo “amena” kufuma kuji konse ne; mwayukatu, kuchiina mba kape banabakazhi bamo bakafumya pechi pa bilungi byabo. Kabiji pano, mwayukatu kintu kitanshi, Namwene maulu abiji nobe *byobya*, kuya mwiulu, kabiji ne maboko abiji akatampe, kabiji ne suki ifita saka isukena poopa, ne kubijika mba, “Amena,” kubijika muyewa musango. Kabiji Natajile panshi, Naambile mba, “Ben, wafumina kwepi?” Aye wafikizhizhenga bingi “amena.”

25 Namwene mukazhanji na kumutala, bitende bitende. Kyawama, aya suki ifita ya-tatula kukepaana, bino abyoo bijitu

bulongo, mwayukatu. Kechi mwikale na kijikila pa kyokyo ne. Yaubile, yami, bimye kyapita kunyuma.

Nanchi, pano, kulubako kulomba ne.

²⁶ Pano mu kimye kyo tubena kufwenya kulubaji lwa mpwijilo lwa bukinshika, vulukai, inge twatanga kikyeye Kyambo, apo Lesa ukapesha Kyambo Kyanji. “Kechi kikabwela kwi Aye kyatutu ne, bino Kikafikizha kyokya kyo Kyatumijilwe.” Kabiji Nayuka, mu kutanga Kyambo, kimye kyonse Amiwa kekalatu bulongo. Inge Natanga Kyambo, Lesa ukanemeka Kyambo Kyanji.

²⁷ Pano twayai twimane kupana mushingi ku Kyambo Kyanji. Yelemiya, kyapitala kyabu 2, maveelesi abu 12 ne 13 a Yelemiya 2.

Kakilwai, Anweba . . . bya mwiulu, na kino kintu, ne kuchinyishatu, kabiji mukankameshetu, byo byaamba aye NKAMBO.

Mambo bantu bami bauba bya bubu bibiji; bandeka amwa nsulo ya meema abumi, ne kwi songela mishima, mishima yalajika, aya ibula . . . kukonsha kulama meema ne.

Twayayi tukunyike mitwe yetu pano.

²⁸ Lesa Mutemwe, Kyambo Kyenu kyatangwa. Kabiji twalomba mba Anweba musakunemeka akye Kyambo, ne kwitupa bufuku buno kishimpi nangwa mo Kipashisha; byo tubena kumona pa moba apita kunyuma, Isalela, nobe kya kumwenako, nobe Baibolo byo etufunjisha amba twakonsha kumona Anweba byo mwaubile kwi abo mu kimye kyo bakokejile Kyambo, twamona Anweba byo mwaubile kwi abo mu kimye kyo bakakelwe kukokela Kyambo, kabiji ne kufunda byo twafwainwa kuuba. Nanchi, twalomba mba musakwaamba kwi atweba bufuku buno mujishinda ja pusanako, pa kuuba mba tuyuke atweba mo twafwainwa kwikela mujino juba, ajo jo twakufundanga lukeelo luno jo tubena kwikalamo. Mambo twaipuzha bino Mujizhina ja Yesu. Amena.

Ikalaiko.

²⁹ Nasaka kwaamba bufuku buno pa mutwe, pa kakimye ka—kacheche pa: *Mishima Yalajika*.

³⁰ Isalela waubile bya bubu bibiji byatama. Lesa waambile mba bafuma kwi Aye, aye Nsulo ya Bumi, kabiji ne kwisongela abo bene mishima ya kutomamo meema. Pano, akyo ke kintukimo.

³¹ Ene mambo o Nalangulukila kino kishina ke mambo akuuba mba byakonsha kwendela pamo na byo Najikwambanga lukeelo luno, bya mukimye kyo tubena kwikalamo, kabiji ne Kine kintu kyo tubena kulwisha.

³² Kabiji tubena kutala pa Isalela nobe kya kumwenako, amba, byo ajinga Lesa, Aye wafwainwa kutwajijila kwikala musango

umo. Kabiji kujitu kitu kimo akyo Lesa kyo apaineko munema, kyajinga ke, jishinda Janji Jo apaine ku bantu. Kabiji byo bafumine mujoja jishinda, nishi Lesa walengululwa, kabiji Lesa wibamanyikile mambo akufuma ku byobya byo Ebabuujiile mba boobe, nangwa kikaletu kiyamusangoka.

Aye wibapele ne mizhilo, “Kukwatako ne, kukwatako ne, kuntopapo ne.” Kechi na mambotu abubi bwa kwikyuba ne, kana na mambo abubi bwakukana kukokela byo aambile Aye mba bobo. Kabiji kimye kyonse kuuba kwaikala muzhilo kwakubula kumanyikwa payewo muzhilo ne. Mambo, inge kwabula kumanyikwa, nishi, muzhilo kafwako kyoaji ne posotu kwayikala kumanyikwa. Aye muzhilo!

³³ Pano, twatana mba, kyo baule mujoja juba kyamweka nobe kijitu pamo na kyo tubena kuba leelo, kibena kuuba bantu babipwilo.

³⁴ Pano twamona kintu kyenya papo. Kyafwainwa kwikala ke kyenya ku bantu bamo, Aye byo aambile mba, “Anweba muji, abo baji, besongela abo bene mishima, mishima yalajika.” Bino, kape anweba bamo kechi mwayuka ne mushima kana ye muka. Baanga bayuka mushima kana ye muka? Kyawama, bavulatu mwianweba. Inge wakomejile pa famu, mwayuka mushima byoanji. Navuluka Nantoma bilongolo byavula kufuma mu umo, pa—pa kuyuka—mushima byoanji.

Nasapwijile mu kyaalo akyo, muji tubinchi twanshikakana tulenga kifutele, komwakonsha kwikala na mbekete yayula meema amumushima, ayikala momwa, afuma ku—ku mvula, mwayukatu, kabiji amweeka nobe abandako pacheche. Kabiji—kabiji ne tubilongolo, mukimye kya bufuku, twakonsha kutwelamo. Kabiji nanchi Nayuka meema amumushima byoaji.

³⁵ Mu—mushima ke—ke mpuzha, ke kintu kyo bapoya mumushiji, kusenda kifulo kya njilayo. Kuntu bantu kobabula njilayo, nishi abo bekala na—na mushima. Mu byambo bikwabo, mushima ke kyalenga-muntu kya kulaminamo meema, nangwa njilayo yalenga-muntu mumushiji, akyo muntu kyo ampoya, kyakulaminamo meema, a—a kwingijisha. Bamo be engijisha ke meema akuwashisha, kabiji bamo be engijisha ke meema akutoma, kabiji ne mashinda apusana, kapepo. Meema onsetu kimye kimo, otwayikalanga nao, afumanga mu mushima. Twayikalanga na kintu kimo kyakala kyo twazhokoloshanga, zhokoloshe, zhokoloshe, zhokoloshe, zhokoloshe, pa kuuba mba tutapule meema; kyajinga na tumambekete twakashilweko, twakumpopa meema kufuma mu mushima.

³⁶ Kyawama, twamonapo kintu kimo akyo kyapusanako na njilayo. Bino, mushima ukooma. Aye—aye—aye mushima kechi wiyuzha ayemwine ne. Kechi ki—ki . . . Kechi kyakuketekela ne. Kechi wakonsha kukosela mushima ne. Akyo kikosela nangwa kyayimenatu pa mvula unonka mayowo nangwa mu kimye

kyamashika, monse mokikela . . . Javula, mukimye kya mashika inge mvula ne mabebe anonka, mikwe ya meema popo iya mu mishima. Kabiji wabula kutambula aa meema, nishi kechi—kechi mwakonsha kwikalapo na meema ne. Onsetu—onsetu . . . ooma. Kabiji kechi wakonsha kwiyuzha aye mwine ne. Mushima wakala kechi wakonsha kwiyuzha ayemwine ne. Utambula kuyula kwaji kufuma ku—ku mvula unonka.

³⁷ Kabiji Nasaka namba mumone kintu kikwabo pa mushima. Javula, mukatana mba, nangwa byo kyajinga kwetu, mushima . . . Javula kipaka kyabanyama kyabaya kukila bukata bwa nzubo ya bantu, kabiji javula meema akukolopela mukipaka kya banyama aya, ku mushima. Navuluka awa mushima wakala uji kookwa, byo ajinga na . . . kimye aya—aya mipaipi yakufumwa biko yatala koka, ne ayo, monka mukipaka. Kiyuzhiwa kufuma mukipaka.

Nachi meema asendwa kufuma pa mutenge wa kipaka; kwepi, bonse banyama bendauka kupita mu kijilamo banyama, kabiji ne ndochi onse ya lubanza wakipaka ikala peulu ya kipaka, mu kimye kya kubula meema. Kabiji apa mino meema ayiya ne kwi byomvwa kufuma pa mutenge, kuya mu kakizhiba kalengwa-namuntu, kupita mu mufolo walengwa-nabantu, byaya mu mushima walengwa-nabantu. Kabiji inge kechi ke busaaji ne, kechi Nayuka kyo ujinakyo ne, umvwe muji na mushima. Ee, mwane! Ke kyalengwatu-namuntu, kabiji ke ndochitu ine.

³⁸ Mwayukatu, twikitelanga mba . . . Twajinga nakisuuso pa umo. Bushe mwikiyuka byo kyajinga nyi? Twabikilenga kisuuso peulu, mukukwata bilongolo byonse ne bintu bifuma peulu ya mutenge wa—wa kipaka, kabiji ne byonse byazhokoloka yoya mpuzha, kabiji ne kwibitulwila kufuma mu kintu kimo kuya mukikwabo, kuya mu mushima. Kabiji twabikangapo ki—kisuuso, mu kukwata byonse abya—abya biko ne bintu byonse bya konsheka. Mambo, abya kuuba byakwata ndochi ine ne, bikwatatu mabulukusu akatampe eya na kuponenamo. Aka kalongolo kafwainwa kuponenamo, bino bifuma mu kalongolo byaya na meema. Nanchi, anweba—anweba mwajingatu na busaji mu kimye kyo mwajinga na mushima wakala wandochi.

³⁹ Mu mobatu acheche, lekai aa meema ekale momwa, kabiji ayikala anshikama. Lekai meema ekale mu mushima, ekala anshikama. Kabiji muyulatu ba—ba bombwe, ne misobela, ne miloolo. Kabiji twibitelanga mba “bilongolo byamikila-biminyangala,” tubitu tuhechetu . . . Amiwa kechi nayuka ne kana . . . Kechi tubishi ne, ke tu . . . Amiwa kechi na konsha ne, kechi Nayuka byo mwafwainwa kwitwita ne. Bino tubitu tuheche tutwela mu meema, byo—byo twatongolanga mba bilongolo byamikila-biminyangala. Mwayuka byotuji. Baanga bayuka byo Mbena kwambapo? Oo, kika, kine, anweba bonse balunda bamumizhi mwayuka. Muyulatu meema abula kupita,

kabiji nachi abo batemwa meema abula kupita beshila nao pamo. Abyo biiyatu, mambo meema kechi abena kupita ne. Kabiji mambo meema ayikala anshikama, eta banyama bonse bajiko batemwa meema anshikama.

⁴⁰ Kabiji abyo bijitu pamo nobe bipwilo byetu leelo. Nalanguluka namba twasha. . . Bubi bumo bwabayisha kipwilo bo kyauba leelo, byonka Isalela byo aubile pa kyokya kimye, wamushile Aye, Nsulo ya Meema a bumi, kabiji ne kwisongela abo bene mishima yalengwa-nabantu. Kabiji kyaulukile ke mwakwikala kyonse kyatemwa meema ayewa musango. Misobela, babombwe, kabiji ne tubishi tonse twa bubipisho, twikala monka, mambo ke kyalengwa-nabantu kya kusungilamo meema. Kabiji mukikye kyakulaminamo meema abye bintu bikala, kyakumwenako kyalumbuluka kya madinominesheni leelo.

⁴¹ “Pano,” mwamba mba, “Mulongo Branham, kika kyowambila kyakonsa pa baabo bantu?”

Kyafwainwa kukajipilwa. Kyafwainwa kukajipilwa. Kinyemai, mambo kumpelo yakyo kikalenga kiyukilo kya lukinyama. Vulukai, akyo ke Bukine! Kikekala ke kiyukilo kya lukinyama. Dinominesheni ukatangijila kuya mukikye. Kiji mujishinda pa kyonka kino kimye, kukajikizha, kwingijisha ngovu.

⁴² Monai mu bumfumu bwakala bwa Kiloma. Akya ikyo kibatwajile mu kiyukilo kya kupondoka. Mwatana kuba mba kafwako muntu nangwa umu wakonsha kupota nangwa kupotolweshwa ne. Aye wafwainwa kwikala nakyo.

⁴³ Kukekalatu mitundu yabantu ibiji bakekala panopantanda: aba banji na Katetesho kakwa Lesa, kabiji ne aba banji kiyukilo kya lukinya. Mitundu ibijitu, nanchi wafwainwa kwikalapo na musango umu nangwa mukwabo. Kikekala ke kupondoka, ke—ke kiyukilo kya—kya bumpopweshi, bumpopweshi bwa kupondoka.

⁴⁴ Kabiji kikekala na kipasha kya lukimya. Kimye kyo tubena kufunda, twatana kuuba mba Loma wajinga, ke, kabiji kimye kyonse ukekalatu, akya kiyu-. . . nangwa, aye lukimya. Kinetu. Kechi kujipo jishinda ja kwikitwajila mujishinda jikwabo ne. Loma!

⁴⁵ Kabiji Loma waubile byepi? Wa alwilwe kufuma ku Loma wabutushi kuya ku Loma waki papa, kabiji ne kulengamo tachikilo ya bukabungwe, tachikilo ya kyaalo kyonse kya panopanshi, akyo kyakajikizhe uji yense kutwela mu bobwa bupompweshi inge ne bakwipaya.

⁴⁶ Kabiji ke kintu kyenyi kyakuba mba uno United States watanwa mukikye, kabiji uji nobe mwaanamukoko. Kabiji mwaanamukoko uji na masengo abiji, sambu ya bantu ne ya bupompweshi. Kabiji pakupita kimye, kimye kyo ajinga

mwaanamukoko, twatana mba waambilenga nobe nsung'unyi kabiji waubile bintu byonse na bulume bonka bwajingapo na nsung'unyi mutanshi. Kabiji Baibolo witubuula mba, "Twayayi tumulengele kinkishi kyapashang'ana na lukinyama." Kinkishi ke kintu kyapasha kintu kikwabo. Kabiji twakonsha kwikimona ponka pano, mu musango wakyo wakupondoka, kipwilo kibena kulenga Kinje kya Ntandayonse kya Bipwilo, akyo ke kinkishi kya bulume bwa Loma; kabiji bakekikajikizha pa bantu kintutu kimo Loma wabutushi kyo aubile . . . nangwa mba kyaubile papa waku Loma. Nanchi, kechi kujipo jishinda jikwabo ne, kafwako kintu kikwabo ne. Bino akyo bo Bukine.

⁴⁷ Kabiji oene mambo o Mbeni kwikajipila mu nkulo yami, mu kimye kyami, mambo kyafwainwa kukajipilwa. Lujimuno lwayiya, kuuba mba, "Fumaimo mwi aye, bantu Bami, kechi mumvwang'ane nanji mu bya bundengamambo bwanji ne!"

⁴⁸ Pano, Nekipashang'anya ku iye ndochi, mishima ya busaji. "Aye ye Nsulo ya Bumi. Aye o Meema a bumi." Kabiji muntu usha Kyokya, kabiji ne kwisongela mishima ayo ikwatatu ndochi. Abyo byobitu byonka byo kyakonsha kukwata. Abyo ndonda ya dinominesheni byo yuba; ikwatatu kintu kyonse kiiya kabiji ne kukeba kutwelamo. Abo benengezha kwikisenda inge kiji na mali, nangwa bakonsha kuvwala mu musango umo. Nangwa bekale bamusangoka, konse kobafuma, bebisendatu, nangwa byonkabyo.

⁴⁹ Pano twatana, jibiji, amba, akye kiyukilo kya lukinyama akyo kyalengelwe kuno . . . America wabalwa pa nambala satiini. Kyasemekelwe na bibuji satiini. kyajiga na mbandela yajinga na tubaangabanga satiini, mikakamba satiini. Kabiji watanwa ne mu Lumwekesho kyapitala kyabu 13. Kabiji America kimyetu kyonse waimenako mwanamukazhi, watanwa pa mali a muwayawaya. Ne tangi wa bena India, uji pa penyi, ke kipasha kya mwanamukazhi. Twayuka kyokyo, yukai jishimikila ja kikye. Bintu byonse, Mbelu wa Bwanabwabene, kabiji ne byonse bikwabo, bwanabwabene . . . Kimiko kya Bwanabwabene, bintu byonse, ke mwanamukazhi. Mwanamukazhi; nambala satiini. Mwamona? Pano, ke—ke kintu kyawama kumona byobyoby bintu.

⁵⁰ Kabiji pano Naambijile jimo na lumwekesho lwakufuma kwi Lesa, nangwa na kimwesho mu 1933, amba bintu sebeni bikamweka kasa mpelo ikyangye kufika. Kabiji amba, kimo kya mu byobyoby, amba, "Mussolini, ao waikelenga tangi kajikizhi, ukekala tangi kajikizhi; kabiji ne jikwabo ukatula mazhita ne kuya ku Ethiopia kabiji ne kutambula Ethiopia; kabiji Mupashi, Waambile mba, 'ukashindwa ku tampulo yanji.'"

⁵¹ Nakumya kana kujipo bamo bakishalapo muboba bajingako-kala mu tambanako, inge mwavuluka na ambilenga kyokyo mu Kishimikwa kya Redman, yavula, myaka yavula kunyuma. Mujipo umo muno mukishimikwa, bufuku buno, ao

wakishalapo muboba bajingako pa Kishimikwa kya Redman kimye kyo Nasapwijile pa kyokyo, kimye kyo bafumishepo ba N.R.A., kunyuma kwine mu kimye kitanshi kyakwa Roosevelt? Naketekela kechi mujipo nangwa umo muno ne. Mujipo umo nyi? Ee, ee, umo, mujipo umo. Ee, ba Mrs. Wilson, Nebavuluka. Bakazhi bami, baikala kunyuma. Babiji bashalapo, ba mukyokya kisemi kyakala kya mu oa moba.

Kuuba mba, byo baambile mba awe N.R.A. wajinga kiyukilo kya lukinyama, Naambile namba, “Kafwako kijipo ne; nangwa pachechetu ne. Kiyukilo kya lukinyama kechi kifumina kuno ne. Kifumina mu Loma. Kabiji kuba kyayikala kiyukilo kya lukinyama ne.”

⁵² Kabiji pano vulukai amba abye bintu bya ambiiwe. Amba, “Adolf Hitler ukekala na mpelo yakukumya. Kabiji ukemanya kondo na United States. Kabiji mba bakanshimika kikatampe—ki—kikatampe kyashamende, kya kuuba mba bakekalangamo ne kwikalamo. Kabiji ponkapa bena America bakampumwa bingi, pa kikye.” Kabiji kyajinga kishilwa kya Siegfried, myaka leveni kasa kikyangye kutatulwa kushimikwa ne. Kabiji kyaambile mba, “Bino ukeya kumpelo; kabiji ba States bakashinda muyoya kondo.”

⁵³ Kabiji kyaambilwe, mba, “Kuji ndonda isatu: Nazism, fascism, ne communism.” Kabiji Naambile mba, “Byonse bikapwilakenatu mu communism. Russia ye ukekisenda kyonse, monka mu communism.”

⁵⁴ Kabiji Naambile mba, “Sayaasi ukaya palepa bingi, muntu ukekala wajimuka bingi, ukafika ne pa kulenga bintu byavula kyakuuba mba ukalenga ne motoka ao umweka nobe jike, ao ukekala na galashi peulu panji, kabiji ukazhalululwa na bulume bukwapo bwapusanako na kindilaivo.” Kabiji banji na yewa motoka.

⁵⁵ Kabiji Naabile mba, “Nanchi byubilo bya banabakazhi betu bikapona kufika pa kipimo kyatama bingi, poso bakekala ke musebanyatu kufika ne mu byaalo byonse. Bakavwalanga bya kumvwala bya banabalume. Bakatwajijilatu na kuvuula bya kuvwala byabo poso bafika pakipimo kya kuvwala bya kumvwala bya mukachi, byo byonka. Kabiji, mu kupezhako, bakatatula kuvwalatu nobe jibuula ja mukuyu.”

Kabiji inge mwamona, mu *Life* magazini wa ngo’ndo wapwa, bajinga na mwanamukazhi wavwala jibuula ja mukuyu. Kabiji abyoye ke byakumvwala byakatataka bya mabaanga abufuku, nangwa mukukumba, byo bavwala mabaanga abufuku; Byapulangila, mwakonsha kumona kupita mukachi kakyoye, kajibuulatu ka mukuyu kafya lubaji lumo lwa mubiji wanji; kwakubula ne tambo ya kukobekelako ne, nangwa tambo, bya kumvwala bya kowelamo byabula byakukobekelako, peulu

yakyo, mubiji washalatu patoka. Kabiji ne bibye bintu byonse byamweka!

⁵⁶ Nanchi Naambile mba, “Namwene mwanamukazhi waimana mu United States, nobe mfumu wamukazhi nangwa kintu kimo. Kabiji wamwekelenga walamba pa kumutala, bino mu muchima wanji kasa muji bubipisho. Kabiji walengejile kyaalo kyaya mutampulo, kwendela pa tampulo yanji.”

⁵⁷ Nanchi Naambile mba, “Mu kupezhako, Aye wang’ambijile mba tala Kumusela jibiji. Kabiji, byo Naubile, Namwene, kyamwekele nobe, nobe kyajinga, ntanda yonse yavumine. Kabiji mwayila byo Namwene, kafwako kyashajilepo ne kana nsala, kabiji—kabiji ne mabwe antupaukile kufuma mumushiji afutumukilenga bwishi.”

Kabiji abye byafwaijilwe kumweka mpelo yantanda kasa ikyangye kufika. Kabiji abye faivi byamweka kala, mu myaka saate-fili. Abo byo kiji, twabwela mu kimye kya kumpelo!

⁵⁸ Kabiji Naambile kwimena awa musango wanyingijilo yaki dinominesheni pa kyonka kya kimye. Kabiji Nakiketekela, bufuku buno, ke kimbo kyo bamvwetapo mwikala ndochi, ke puzha iyamo biko byonse. Amiwa kechi naketekela mba Lesa wakonsha kutwala kintu kya byo kiji mu Kipwilo Kyanji ne, mambo kyafwainwa kusemwa ku Mupashi wakwa Lesa kabiji ne komvwewa kasa akyangye kwikitela mba Kyanji. Aye Mubiji wa Kilishitu ubula kumweka, mo Twabatizhiwa kupichila mu lubatizhilo lwa Mupashi Wazhila.

⁵⁹ Ee, aye nyingijilo ya mushima kine ke kya kumwenako kyalumbuluka kya dinominesheni. Muntu wamana wafwainwa kutajisha, kabiji kechi wafwainwa kutwelamo mu kikye ne, mambo Lesa washinikisha kupita mu mankulo amba Aye wikishikwa kabiji kechi wakingilapo nakyo ne. Jibumba jonse . . . Kimye kyonse muntu po emana na mbila, nobe Luther, Wesley, nangwa bakwabotu, ne Smith, ne Calvin, kabiji ne abo, kimye kyo batatwile kulengamo kabungwe, Lesa wikibikiletu akyo kintu pa tebulu kabiji kechi wabweleko jibiji mu kusangululwa ne.

⁶⁰ Talai kupita mu jishimikila. Kechi kwakilapo kala kimye akyo Lesa kyo atolelepo dinominesheni, ne kulenga kusangululwa kufuma mukikye ne, kafwako. Nanchi, kupichila mu jishimikila kabiji ne Baibolo, kyashinikishiwa amba ke kintu kya bubi kumeso akwa Lesa, nanchi kechi Nkeba kubapo kintu kiji kyonse na kikye ne. Kabiji oene mambo Amiwa kyo ne kipachila. Mbena kweseka kufumyamo bantu mukikye.

⁶¹ Atwebwa twayitwa, nobe mu Isalela, nanchi byo kiji ne pa kino kimye, kutajisha ku Isalela nobe kya kumwenako. Abo, kimye kyonse kyo baikela nayoya Nsulo, bajingatu bulongo. Pakuba byo batatwiletu kwi songela abo bene mishima, nyingijilo yalengwa-nabantu, apo Lesa po ebalekejile. Aye

uketuuba musango umo. “Abo bamuleka Aye, yo Nsulo ya Meema abumi.” Ako ko kwijizhanya kwa Lesa koajinga nako pe abo. “Kulengamo kintu kimo kyo bakonsha kwaamba mba, ‘Mwamona kyo twauba!’”

⁶² Pano, mu kimye kya—kya kwenda kwakwa Mosesa; kimye Lesa, kupichila mulusa, wibapele ngauzhi, wibapele Mumbulungwa wa Mujilo kutangila palutwe yabo, wikishinikishe Kye kupichila mu biyukilo ne mu byakukumya. Lusa lwanengezhezhe bintu byonse bye. Isalela wakikebelengatu, wamwenenga mizhilo. Bakaine lusa, ne kukebako mizhilo.

Abyo ibyo bantu kine byo boba leelo. Abo bakana Kyambo, mukusendako nyingijilo yabu dinominesheni, mambo mu kyokyo bakonsha kuuba kiji kyonse kyobakeba kabiji ne kuzhatwa ne. Bino kuuba mwikyuba mwi Kilishitu ne! Wafwainwa kwikala watokeshiwa kabiji babulwa biko, pa kuuba mba wikale mwi Kilishitu.

⁶³ Kusha nsulo itupauka, ne kuya kunyingijilo yalengwa-nabantu nangwa mushima, bushe mwakonsha kwitabizha mba muntu umo wikyuba nyi? Bushe mwakonsha kulanguluka butuntulu bwa muntu wakonsha kutoma mu nsulo itupauka, kabiji wabwela washa kyokyo ne kuya ku mushima walenga-bantu muji ne babombwe, misobela, ne bilongolo biji namikila-biminyangala, kabiji ne bintu bikwabo kasa biji monka nyi?

Bino kechi kimweshatu mba kiji bulongo ne, bino abye bantu byobyoby bauba. Basha Kyambo, Nsulo kine yafuma kwi Lesa kabiji ne Bulume, ne kutoma kufuma mu mishima, ne kwilengela abo bene mishima. Pamotu byonka byo baubile pa kyokya kimye, bekyuba neluno. Baamba mba . . .

Aye waambile mba, “Bandeka Amiwa.” Apo Aye waamba mba, mumwe mu Yelemiya 2:14, nangwa 13, byonkabyo. Aye waambile mba, “Bandeka Amiwa, Nsulo ya Meema a bumi.”

⁶⁴ Pano, twamona mushima byoanji. Twamona bintu byo kikwata. Twamona byo kyalengwa. Ke kintu kyalengwa-kumuntu kifumya pa mutenge wa ndochi. Aa meema anonkela panshi, afikila pa mutenge wa ndochi, kabiji kyomvwatu mutenge, ne kwi abika panshi kupichila mu mufolo walengwa-nabantu, kuya mu kakizhiba kalenga-muntu, aya mwakulamina meema mwalenga-muntu. Kabiji byonse bya ndochi bibungakena monka, kabiji ne—ne tubinshi, ne misobela, ne babombwe, kabiji ne bintu bya pa mushiji, byonka bya. Kabiji, monai, ke banyama ba biko; bilongolo bya mikila-biminyangala, meema abula kupita. Kilongolo kya mukila-kiminyangala kuuba kyaikala mu meema atoka ne. Inge kyaubiwa byobyoby, kikamwipaya. Akyo kyafwainwa kwikala mu meema abula kupita.

⁶⁵ Kabiji abyoyoby kiji na tutwe tulongolo tutoma mashi leelo. Anweba kuuba mwayikala mu meema a katataka a Mupashi Wazhila ne. Ao oene mambo kyo bakosela na kukana Kyambo, kabiji ne kwamba mba, “Kipachika akyo Kine. Kafwako nangwa kimo Kijipo ne.” Ke mambo akuuba mba bafwainwa kwikala na kizhiba kya meema abula kupita mwakuminyangela. Kijitu.

Ajo jo jishinda jimo byokikala na mabombwe, na misobela, kabiji ne na bivube, kabiji ne bya byobyoy. Bafwainwa kwikala kwipi na puzha yameema nangwa kizhiba kya meema abula kupita, kuuba mba bekale, mambo ke kisho kyabo kya kwikala momwa. Kabiji kuba mwapipula nyama ne kana patanshi mwaalula kitemwa kyanji.

Kabiji kuuba mwalengela muntu kumona Kyambo kya Lesa ne poso kitemwa kyanji kyapipulwa; kabiji inge kitemwa kyanji kyapipulwa kufuma mu musango ye ajimo, kwalulwa ke mwaana Lesa, kabiji ne Mupashi Wazhila waiya mwiaye. Aye Mupashi Wazhila ye wanembele Kyambo kya Lesa!

⁶⁶ Leelo Najikwambanga na mulunda nami wawama, Dokotala Lee Vayle, ao uji muno pakino kimye. Kabiji aye wafunda bingi masukuulu abyambo bya lesa, kabiji nanchi bimye byavula twikala na—na misambo yawama pa Kinembelo. Wajimuka bingi.

Kabiji wangipwizhe pa kimye kimo byo Ndanguluka na kiyukilo kitanshi kya Mupashi Wazhila, “Bushe kwamba na jimi nyi?” Kyajinga myaka yavula yapitapo.

Naambile namba, “Ine; kechi ne kimona kyo ne.”

Aye wambile mba, “Nangwatu Amiwa kechi nekimona ne,” waambile mba, “nangwatu Nafunjishiwa kyokyo.” Aye waambile mba, “Mwalanguluka mba kiyukilo kitanshi kika?”

⁶⁷ Naambile mba, “Kiyukilo kyalumbuluka kyo Nakonsha kulanguluka ke butemwe.” Kabiji twatatwile kwamba pa kyokyo.

Kabiji nanchi Nalangulukile mba akyo kyaumvanyikile bingi bulongo nanchi Nakwajijiletu ku kyonka kyo, “Inge muntu uji na butemwe.”

Bino juba jimo aye Nkambo, mu kimwesho, wangolwele pakikye. Kabiji Aye waambile, mba, “Kiyukilo kya Mupashi ke bobo bakonsha kutambula Kyambo,” kechi butemwe ne, nangwa kwamba mujimi ne, bino ke kutambula Kyambo.

⁶⁸ Kabiji nanchi Dokotala Vayle waambilenga pe ami, amba, “Akyo ke Kyanembwa,” aye waambile mba, “mambo, mu Yoano 14, Yesu waambile mba, ‘Umwwe Aye Mupashi Wazhila byo waiya pe anweba, Aye ukasolola abye bintu kwi anweba, byo Nemufunjisha, kabiji ukemumweshwa bintu bikeya.’”

Nanchi abo bo bukamonyi bwakine bwa Mupashi Wazhila! Aye ukyangye kumbulapo kintu kyatala mungi ne. Amba, “Ke kiyukilo kya Mupashi Wazhila, ke yewa wakonsha ku ketekela Kyambo.” Mwakonsha kwi Kitambula.

Mambo, Yesu kechi waambilepo mba, “Umwve Mupashi Wazhila waiya, mukamba na jimi ne.” Aye kechi wambile mba, Mupashi Wazhila byo akeya, mukoba bya mubyonse bye ne. Bino Aye waambile mba, “Aye ukasenda abye bintu Byami ne kwimumweshwa byo, kabiji ukemumweshwa bintu bikeya.” Nanchi abo bo bukamonyi butanshi bwa Mupashi Wazhila, mwaila Yesu Ayemwine.

⁶⁹ Nanchi abye bintu byakumvwa kumubiji ne bintu bantu byo banji nabyo kabiji ne kutwajijila kwikala, mwakonsha kumona kika kyo bobila bibye. Monai, kikala ke dinominesheni, nangwa kizhiba kiji na meema abula kupita, kabiji kechi kukekalapo dinominesheni yalengwa pa- . . . Kyambo kya Lesa kyalumbuluka. Kuuba kyaubika ne, mambo kechi mwakonsha kubika nangwa kukasa Lesa ne. Ine, mwane!

⁷⁰ Ene mambo kyo kyaikela byo byo ke, mwatanu jibumba ja bantu baketekela Kyambo, balekai batatulemo kabungwe. Kintu kitanshi mwayukatu, mukachi ka mwaka umo mwatanu jibumba ja ba Rickys mukachi kabo ajo jo wakonsha kubula kuba najo kintu nangwa kimotu ne. Abo bakwachijilat, kabiji kafwako nangwa kimo kyo wakonsha kuba nakyo ne. Kechi nyingijilo ya kwa Lesa ne. Kechi iyo ne, nanchi twayuka mba akya kintu kifwamo. Kikalatu ke mushima, kabiji kikala ke puzha ayo muntu yense usaka kunekenya pa *kikye*, *kyokya*, nangwa kintu *kikwabo*, ke mwakwikalatu bamembala, nangwa mwaleka bantu batwelamo.

⁷¹ Twatana kuba mba, aye nyingijilo yatatwile kimye kimo, kunyuma mu moba abena Isalela, kimye kyo basongelenga aye mishima. Kabiji kwajinga muntu umo ne jibumba ja ba Faliseo abo basongele mishima. Kabiji bajinga na muntu watelelwa jizhina amba Herod, kabiji aye wajinga wa kubijika, kafinyala wa kibuji.

Kabiji aye wayishile na kumvwa muntu ao wabujile kukosamika ma dinominesheni abo ne. Aye wajinga ngauzhi. Kabiji kechi kwajingapo ngauzhi wayingijilepo na madinominesheni, bino wikinshikilwe. Awe ngauzhi watatwile kwamba mba, “Kechi mwiambilenga anwe bene na bene amba, ‘Tuji nashetu Abulahama,’ mambo Nemubula mba Lesa wakosha kwalula ao mabwe ke baana ba kwa Abulahamu.”

⁷² Kabiji ba muletejile kinemanga amba amumvwe. Kabiji awe kinemanga watolele mukazhi wa mulongo wanji, kabiji ne kumusongola. Kabiji awa muntu walupukile ne ku mwambila pa meso anji mbaka? Abo balangulukile mba usakwibinekenya, kabiji waambile mba, “Pano, mwane, anweba, muji na kipona

kyawama *papo*. Kabiji mwafwainwa ku... Njibingi nalusekelo byomuji muno mu kung'umvwa ami leelo.”

Yoano wayiletu monka mukilungi kyanji, ne kumwambila mba, “Kechi kyaswishiwa anweba kwikala nanji ne.” Kintu kitanshi kyo aambile, wamukajipijile pa bubi bwanji.

⁷³ Monai, madinominesheni alenga bizhiba byameema abula kupita apo mwanamulume po akonsha kwikala na banabakazhi, kabiji ne abo banabakazhi batwajijila mubyobyoby bintu, kabiji ne kutenda suki yabo, ne kuvwala tuputula, ne byonsetu, kabiji ne kwitela bene mba Benakilishitu.

Bino Nsulo ya kine, aleluya, na Bulume bwa Lesa, kuuba kyaikalapo ne, mambo Kibilupulapo. “Amiwa ne Nsulo ya Meema a bumi. Abo bandeka Amiwa, ne kwisongela abo bene mishima.”

⁷⁴ Pano, nsulo ya meema a bumi, twatana mba, nsulo ya meema abumi kyokika? Twatana mushima ye muka, pano nga nsulo ya meema a bumi yo ika? Ke mushima utumpauka meema.

“Mushima utumpauka meema, kyo kika, Mulongo Branham?”

Ke mushima ufumina panshi ne kushijika meema akyo kulupuka. Kimye kyonse abena kupita. Aye mwine-witundaika. Kimye kyonse apya kabiji awama, mushima utumpauka meema, ke nsulo ya meema a bumi. Kechi afwa nangwa kunshikama ne. Aji na bumi, kimye kyonse abena kutayatu, ubena kuletatu meema apya kimye kyonse, abena kwenda kuya, kufuma ku mansulo. Afumya bunoshi bwakyo ku—ku munshime wakyo, akyo kiji ke...kikijitu nsulo ya meema a bumi abena kusansa peulu. Ewamishatu-ene; atoka, abula kiko, meema atoka. Ekwashatu-ene; kafwako kupembelela mvula mba bino mwakusungila meema muyule ne. Kimye kyonse abena kutupauka na kulupula, apana meema atuntu. Kechi mwafwainwa kwi ampapa ne, kwi azhokolosha ne, kwi kyalulula ne, nangwa kwi kinungankanya ne. Ke nsulotu ya meema a bumi.

⁷⁵ Mwayuka, mwatola aye mishima yakala, mwafwainwa kwikizhokolosha ne kwikizhokolosha ne kwikizhokolosha, ne kumpopa kabiji ne byonsetu, pa kufumyamo acheche a muoa meema ashinkama. Uu!

Pakuuba Nsulo ya Meema a bumi Yialupula, kyangatuntu, kwakubula kumpopa, kunungakanya, ne bintutu bikwabo. Oo, Amiwa njina nalusekelo pa yiye Nsulo! Ee, mwane!

⁷⁶ Kechi kikebewa Kubikako kyakusushilako ne, pa kufumyamo tulungolo. Mambo, Kibena kufuma panshi peene, amfwa monka Mujibwe, posotu mwayikala mwabula bilungolo.

Kechi kikebewa kwikala na kiyukilo kya kufunda kyaimana Peakyo ne, abyoyoby, bintu bimo byalengwa-nantanda

byanyingijilo ya maana a kidinominesheni a lengwa-nabantu; kwi mubulako, utala pa bakonye, kana wakonsha kusapwila nyi inyi ne. Kechi jipo na kimo kya byobya bya busanji kya kobama Peakyo ne. Kyafwainwa kufumishiwapo bukiji bukiji aku mwikibikakotu. Kuuba mwikyuba ne. Awa mushima ubena kutupauka, kimye kyonse. Mwafwainwa kubikako kisapi kyakala, kyafwainwa kwikifumyamo kutula ku lubaji lumo nangwa lukwabo. Kechi jipo na kimye kyakubikako kisapi kya dinominesheni ne.

⁷⁷ Kechi kikeba sefwa ne, kisuso ne, kafwako kumpopa ne, nangwa kukoka ne, kafwako kintu kikwabo ne. Kyayikalatu, kutupauka. Kechi tupembelela mvula unonka mupuzha pakuuba mba kiyule na meema ne. *Mvula* ke “kusangululwa,” kwepi kuji Nsulo...Akyo ke payoya Nsulo ya Bumi. “Paji Mubiji wanyama wafwa, bampungu kobakabungakena.” Kechi mwafwainwa kumpopa amba kwikale kusangululwa ne; kechi wafwainwa kumpopa ne. Kintutu kyo mwafwainwa kubu ke kwiya ku Nsulo. Kimye kyonse kyayulatu na buwame, meema apya, kabiji kechi kujipo mpelo kwi Akyo ne. Kitwajijilatu nakutupauka.

⁷⁸ Kechi mwafwainwa kuya ku mushima ne, ne kwamba mba, “Kyawama, inge yanonka ne komvwa kipaka kyabanyama, tusakwikala na bya kutoma.” Mwamona? Ami, ami! Kechi bibye ne. Aya nsulo ya mushima utupauka ubena kulupulatu byawama, meema atalala kimye kyonse. Mwakonsha kuketekela mwi akyo. Kechi mwakonsha kwaamba mba, “Kyawama, Nkaya kuyuwe mushima wakala. Motwatomanga, bino kechi ya nonka pakimye kyabaya ne. Nemubuula, wakonsha kuuma.”

⁷⁹ Abyo byobiji aye nyingijilo imo yalenga-bantu. Mwakonsha kutwelamo, umvwe muji nakintu kimo kyabaya kibena kubiwa, nyingijilo yabaya ya kupotesha bitu bimo, nangwa—nangwa nobe kintu kimo kibena kubiwa, kijilo kikatampe kabiji ne bintu byubiwa, kayilo yakubekya, kabiji ne bijilo mu manzubo apeulu, ne byonsetu, mwakonsha kutana nzubo yonse yayula.

Bino komwafwainwa kuya ke kokwa kuji Nsulo ibena kutupauka, kimye kyonse, bantu baji konka babena kutambula awama, meema akutoma atalala. Mwakonsha kuketekela mwi Akyo! Amba, “Kechi baikalapo na kusangululwa pa myaka teeni ne.” Inge mwaikela ku Nsulo, Aye kimye kyonse uji na kusangululwa kubena kubiwa.

⁸⁰ Nobe mwanamulume Mwinawelsh wakepa mubiji waambile mba. Nangwa, kimye kimo byobajinga na kusangululwa kwa ku Welsh, kwajinga bantu babinemanga bafumine ku States. Bamo bamubabo ba Dokotala ba Bulesa byo bayile ku Wales, na kukeba kuyuka kwepi kabiji abye byonse byobika. Nanchi abo bajinga na mateneshi afutuka-azhokoloka, kabiji ne bisochi byabo, kabiji baendelenga mu mukwakwa.

Kabiji kwayishilenga kapokola kulutwe, na kuzhokolosha mukombo wajinga mu kuboko kwaji, na kwita mulozhi, “Ponka pa musalabo po pafwijile Mupulushi wami, mukungomvwa kufumya ku bubi ko Nayichijile; konkakwa Mashi ko asashilwe kumuchima wami, lukumo lwikale ku Jizhina Jaji,” byo aendelenga mu mukwakwa.

Nanchi baambile mba, “Akye kyamweka nobe muntu wabumpopweshi. Tuye tumwipuzhe.” Kabiji baambile mba, “Anweba!”

Waambile mba, “Ee, mwane?”

Aye waambile mba, “Twaiya kuno kufuma ku United States. Atweba twijibumba jabenyi. Twaiya kuno na kukebakeba kwakusangululwa kwa ku Welsh, byo-kwatelwa. Atweba twi ma Dokotala a Bulesa, kabiji twaiya kuno amba tulondaizhe tuyuke mokyayila.” Aye waambile mba, “Tukeba kuyuka kwepi kuji kusangululwa, kabiji kwayikela kwepi.”

Aye waambile mba, “Mwane, mwafika. Amiwa yami kusangululwa kwa ku Welsh.” Amena! “Akwe kusangululwa kwa ku Welsh kuji mwi amiwa. Kuno yiko kokuji.”

⁸¹ Abyo byo byo kiji umvwe wayikela ku Nsulo ya Meema a bumi. Kimye kyonse kinji na bumi, kutupauka jikwabo ne jikwabo, kabiji jikwabo ne jikwabo. Kechi kuji mpelo kwi Akyo ne. Kechi mba, “Yainga mukamone inge meema, inge kechi papita moba kufuma pa nonkejile mvula ne,” aby o kechi ibyo ne. Ke Nsulo ya Meema abumi. Monka Mong’ambila, Kipana Meema Akyo kyatutu.

⁸² Kechi kyafwainwa kubikapo bisapi pe Akyo ne, pakuuba mba muyuke; bisapi byamusango wafunjilo, kasa mukyangye kumutuma amba akasapwile ne, kabiji ne kumona kana usopelela byambo bulongo, kana wibyamba bulongo, kana wingijisha mazhina nangwa bintu bimenako mazhina, ne bikwabotu, kabiji ne byayimenako bintu bikwabo. Bavula mwiabo kechi bebiyuka byobiji ne, bino ubena kwikala pa Nsulo byonka byo anji, monai, byonka byo anji.

⁸³ Kechi kiketekela pa mvula inonka mu mupuzha ne, kuuba mba kiyule, nangwa kusangululwa kwa mupuzha ne, mambo a akyo. Kechi nafwainwa kuba kyokyo ne, mambo bulume bwakyo ne buwame buji mwi akyo nkine. Amo mo muji Kyambo, Bulume Bwakyo Kiine! Inge muntu wi Kitambula mu muchima wanji, Kiji na Buwame bwakyo. Kiji na bulume Bwakyo. Kijitu monka mu Kyambo Akyonkine, kilupula Bumi.

⁸⁴ Isalela byo sakile kufumako kwi Akyo, bataanwengwa mulukatazho. Kimye kyonse kyo bafumineko kwi Akyo, bataanwe mulukatazho.

Kijitu pamo nobe byotuba pakino kimye. Umvwe kusangululwa kwafumako ku Kyokyo, nachi kechi kyawama

ne. Kipoyila akyokiine mishima, kabiji, nangwa mishima imo ibula kupita meema, kabiji abyo byobyo kikala.

⁸⁵ Bino Aye kimye kyonse wibakwashishe. Kwijizhang'anya kwa pa Kalunga Kachila, nanchi kimye kyo bejizhang'enye. . . Nangwa byonkabyo, mu byonse byo, Aye walaile, wibapele mulaye. Aye wafwainwe kwibalulula babwele konkakwa, mujishinda jotwakonsha kwi kimwenamo; bino Aye wibalaile kwibatwala kokwa.

Kika Aye kyoabile? Abo baana ba Isalela, Aye wibapele Mumbulungwa wa Mujilo ne byonsetu, bikale bya kushinikisha, ngauzhi wabo. Kabiji bebatangijilwe kufika ne kukalunga. Kabiji, kimye kyonse, kuji, Kabiji, kimye kyonse, kwikala lukatazho Pakikyue. Kabiji byo aishile Felo ne nzhita yanji. Kabiji mwayukatu byo aubile Lesa? Aye wanshikwiletu aka kachila, mushima wa meema abula kupita.

Ako Kalunga Kabafu kekintu kyakila mubulufu pantanda ponse. Akyo kyafwa bingi. Kiji kyanshikama. Kafwako nangwa kintu kimo kyakonsha kwikalamo ne.

Kabiji Aye wikinshikwile ne kwibakasulula, kulubaji lukwabo. Aye wibatwajile kuntu ko bakonsha kubula kukaswa kukintu kiji byobya ne.

⁸⁶ Monka mungyetu, bataine kubamba byakulaminamo meema kechi bya kuketekela ne; byajinga byauma. Bataine kuba mba, bayilenga kufuma pa kimbo kimo kuya pa kikwabo. Kimye kyo bajinga mungyetu, bafwilenga na nzala, ne meema akutoma. Kabiji bayilenga mumwe mwakulamina meema kukwe, pa kizhiba; pajinga pauma. Baaya kupuzha ikwabo; pajinga pauma. Abo kechi balangulukilenga mba bakonsha kutana byakutoma ne.

Kabiji papuzha pabulwa kuketekelwa mu kiselebwa, bataine meema. Kyajinga mujibwe. Kyajinga mujibwe. Ke puzha ao muntu yoakonsha kubula kutanapo meema aji onse ne, kyafwainwa kwikala ke mujibwe jauma pakachi ka kiselebwa. Bino, mwamona, Lesa uba bintu muyekawa musango. Pakifulo kyafwainwa kubula kuketekela, mujishinda mokibula kumwekela. Abo byo twajinga nabyo kimye kyonse.

⁸⁷ Abo balanguluka mba wafwainwa kwikala na dinominesheni wabaya, pamo, kabiji balekai bonse beye pamo ne kwikala na kinzubo kikatampe kya kukayilamo bunga, ne bintutu bikwabo, kabiji ne kusenda masauzande bakwatakane pamo, kabiji ne bonse byonka *bye*, pakuuba mba bekale na kusangululwa.

Kimye kimo Lesa usenda muntu mukulumpe wa kamubiji kacheche wabula kuyuka ne ABC's wanji, kabiji monka mukachi kabantu babula kufunda abo babula kuyuka kuboko kwa kilujo kufuma kukipiko, Aye wakonsha kutatula kusangululwa kwakonsha kusukenya ntanda yonse. Aye wikyubile mukimye

kyakwa Yoano. Aye wikyubile mukimye kya bangauzhi. Kafwako nangwa umo mwiabo, byo twikiyuka, wajinga wafunda ne, bino Lesa wibatolelenga ne kwingila nabo kintu kimo.

⁸⁸ Monka mujije jibwe momwafumine meema. Aye wajinga Jibwe. Kabiji Aye wakambizhe jije Jibwe, amba jipumiwe. Kabiji Aye wapaine avula awama, apya, meema atoka kumuntu yense wakonsha kutoma. Aye wapulwishe bonse batomene kwi Ajo. Ke kintu kyalumbuluka kyaesakana pmo na Yoano 3:16.

...Lesa byo atemenwe bapanopantanda, amba wapaine Mwaanaji yeka umo, ...yense waitabila mwi aye kechi onaike ne, pakuuba ukekala na bumi bwa myaka,

⁸⁹ Lesa wapumine ku Jibwe, pa Kalvali. Luzhachisho lwetu lwajinga pe Aye, amba kufuma mwi Aye mufume Mupashi wa Bumi ao unkemupa anweba ne amiwa Bumi Bwape. Akyo ke kishipi kyalumbuluka kyatala Kwiakyo, amwe mukikye kiselebwa.

⁹⁰ Abo kechi bafwayijilwe kukoka, kupoya, ku mpopa, nangwa kuba kiji kyonse ne; kana kutola lubaji kujishinda Janji janengezhiwa, kyatutu. Mukyokya kimye, kechi bafwaijilwe kwikipoya mu kizhiba ne. Abo kechi bafwaijilwe kundosa na mbekete ne. Abo kechi bafwayijilwe kuzhokolosha pakuuba mba bekitambule ne. Abo bafwayijilwe kutolakotu lubaji.

Kabiji abyo byobyonka bijiko pano. Anweba kechi mwafwainwa kutwela mukintu nangwa kimo ne. Anweba kechi mwafwainwa kuya kulutwe kukitapisho na kwingilapo kintu kimo ne, kwi kimpopa. Anweba kechi mwafwainwa kwamba kyambo jikwabo ne jikwabo ne jikwabo, poso mwalubankanya ne mulaka. Kintutu kyo mwafwainwa kuuba anweba ke kumutolatu Aye, kyatutu, jishinda jo anengezha Lesa. Kafwako kumpopa ne, kafwako kushijika ne, kafwako nangwa kimo kyakuba ne; anweba Kwikitolatu, kyatutu. Kafwako nangwa kimo kyo wafwainwa kuuba ne; anweba ke kutolakotu lubaji lwa Kikye. Kokuba mba, anweba Kiketekelaitu. Akyo kyokyoka kyo Nafwainwa kwamba pa kiky.

Abo kechi bafwayijilwe kuuba kintu nangwa kimo ne. Kechi bafwayijilwe kwi kipoya ne. Abo kechi bafwayijilwe kwikala panshi ne kujila bufuku bonse ne, pa kiky. Abo batoleleketu lubaji ku kiky; kyaji kyampumiwa ne kunengezhiwa jimo. Abo ibyo.

⁹¹ Amiwa mbena kutala pa muntu pa kino kimye, waikala kunyuma ya kibamba kokwa. Navuluka kumubula mba, juba jimo ku kipaka kyakala, kwipi nakijilamo banyama.

Kabiji waambile mba, "Bino Amiwa kechi nawama ne."

⁹² Naambile mba, "Nayuka mba kechi byo uji ne." Kabiji Naambile mba, "Amiwa kechi byoji ne, ne ami." Bino Naambile

mba, “Ubena kutala pa byo uji. Kabiji leka kutala pa byo uji, ne kutalatu pa byo Aji.”

Aye waambile mba, “Inge Nakonsha kulekatu awe fwaka, Mulongo Branham, Na—Na—Nakonsha kwikala Mwinakilishitu.”

⁹³ Naambile mba, “Kechi wakonsha kumuleka ne. Obewa nishi ubena kweseka kwikala wawama apa mino waiya kwi Aye. Aye kechi wayishile na kupulusha muntu wawama ne; Aye wayishila nakupulusha bantu batama aba bayuka mba batama.”

Aye waambile mba, “Kyawama . . .”

Naambile mba, “Telekai, kechi mubena kukeba kuya kungehena ne, mubena kukeba nyi?”

Aye waambile mba, “Ine.”

⁹⁴ Naambile mba, “Kyawama, kechi wafwainwa ne. Aye wakufwijile pakuba mba obewa ubule kuyako.”

Aye waambile mba, “Kika kyo Nafwainwa kuuba?”

Naambile mba, “Kafwako. Kijitu kyapeela.”

Aye waambile mba, “Bino inge Nakonsha . . .”

⁹⁵ Naambile mba, “Abyo byo byo kiji, kubwela kuyewa fwaka ne jikwabo. Lekai kulanguluka pa yewa fwaka. Vulukaitu, langulukaitu pe Aye, ne byo Aubile, ne Byoaji; kechi byouji ne. Obewa kechi wawama ne; kabiji kechi wajingapo byo byo ne, kabiji kechi ukekalapo byo byo ne. Bino, kana byo aji Aye, Ayetu ye Yeka!” Kabiji Naambile mba, “Pano, kintutu kyo wafwainwa kuuba; inge Aye wasendele kifulo kyobe, obewa uswetu byo Akubijile. Kintutu kimo kyo wafwainwa kuuba obewa ke kwikiswatu.”

“Kika,” waambile mba, “akyo kyapeelatu. Amiwa nkoba kyokyo.”

⁹⁶ Naambile mba, “Aluno lolukatazho.” Mwamona? Namuletele kuno ne ku mubatizha mu Jizhina ja Yesu Kilishitu.

Bamo bantu banji baikala muno, kabiji Na—Nayuka bang’umvwijile bibi ami pa kuuba kyokyo, bino Nayuka kyo Naubilenga. Namwenemo kintu kimo muyewa muntu kyajinga kya bukine. Nakonsheshe kwi kimona momwa, kabiji Namutolele ne ku mubatizha mu Jizhina ja Nkambo Yesu.

Kabiji, byo twaubile kyokya, kechi papichile kimye kyabaya ne byo Nayile ku nzubo ya mwaanaji wamulume. Twamwene ki—kimwesho kya kinchi kibena kumokolwa patupamo, kabiji awa mwanamulume waponene, pepitu kwi monkola nyuma yanji. Wamutwajile mu kipatela. Kabiji abwa bufuku Nkambo wasolwele, kwi amiwa, aya yonka yoyajinga mpelo yamafwaka.

Nanchi juba jalondejilepo wakebelenga fwaka. Naambile mba, “Amiwa kamupotela kibokoshi ne kumutwajila. Anweba talayingatu ne kumona, moba anji afwaka apita.” Aye kechi

wakipeepapo nangwa jimo ne, kabiji kechi wakikebapo nangwa umo kufumatu ku kyokya kimye ne. Lesa!

⁹⁷ Monai, kintu kitanshi kyo wafwainwa kuuba ke kwiyatu ku Nsulo. Wafwainwa kwiya ku oa Meema, vulukayitu mba kechi ke kintu kyo mwafwainwa kuuba ne. Ke kintu Aye kyo emubila anweba. Anweba kechi kwafwainwa kupoya ne; kechi mwafwainwa kumpopa; kechi mwafwainwa kuleka *kikye*; kechi mwafwainwa kuleka *kyokya* ne. Kintutu kyo wafwainwa kuuba ke kufikakotu ne kutoma. Abyo byo byonka. Inge uji na kilaka, toma!

⁹⁸ Pano, Aye wajinga joja Jibwe. Lesa wamupumine Aye na mambo a atweba, kabiji Aye wapaine avulatu awama, meema atoka. Aye uba nangwa byonkabyo, leelo, kuyense wakonsha kwitabila. Alwe ke lusa Lwanji, nangwa byonkabyo, ku bantu Banji, atweba.

⁹⁹ Kuji kintu kimo kiji nobe kokwa, nobe bantu ba buleelo, benengezha kutambula kyo bakonsha kutambula, bino kechi bakeba kwipana kwingijila mu kubwezhapo po byafuma ne. Isalela wajinga winengezha ku—kutoma kufuma ku jibwe, bino kechi bakebelenga kupana kwi Lesa mingilo Yanji ayo ya Mufwainwa ne.

¹⁰⁰ Kabiji Aye kimye kyonse ubena kwitwingijila. Anweba mwayukatu, kechi twakonsha kupema kwakubula Aye ne. Atweba kechi twakonsha kupeema kwakubula Lesa kwitwingijila ne. Abyo byo twaketekala mwi Aye. Kabiji, nangwa byonkabyo, kikalatu peepi na kwi twabanyapo bibese bibiji inge twaeseka kuuba, inge twamwingijilapo Aye kintu kimo. Aye witwipuzha mba tubepo kintu kimo, yanga ukamonepo muntu umo, yanga ukalombelelepo muntu umo, kikalatu nobe kibena kwitwabanyapo, pakuuba mba twikyube. Bino kechi tukeba kumubilapo Aye kintu kimo kya mumwingilo ne.

¹⁰¹ Kwanji kwijizhang'anya kwajinga mba, “Bandeka Amiwa, Kyambo; kabiji baswako mushima walajika, mukyokyo kifulo. Kuswa... Bandeka Amiwa, Nsulo ya Bumi, Nsulo ya Meema a Bumi; kabiji bakeba ne kutoma kufuma ku mushima wanshikama.” Mwafwainwa kufwanyikizha kyokyo nyi?

¹⁰² Mwakonsha kufwanyikizha muntu pano, amba, *kuno* kuji mushima utumpauka awama, meema a mujibwe janekena, kufumatu monka mukachi ka muchima wa jibwe, kupita mu busenga bwa mu mushiime, kabiji ne bikwabotu, ajitu atalala kabiji awamatu byonka byo afwainwa kwikala; kabiji kyafwainwa ne kutoma kufuma mu mushima uji kokwa, ao uji na bya omvwewa bya peulu ya kipaka, ne byonse bya mubifutele, kabiji ne byonse bifuma mubinshimikwa-byapangye byazhokoloka puzha? Kabiji ne kubikwa muyewa mushima, amo meema mo apita kubwela monka jibiji, kufuma mu

kipaka, mwikala ba mbili ne bipaka bya ng'ombe, kabiji ne byosetu kupita kubwela monka mu mushima, kabiji nanchi tukeba kuswi- . . . wafwainwa kutoma kufuma mukyokyo kasa mukyanye kuya ku nsulo itupauka nyi? Pafwainwa kwikalapo kimo kyatama mumilanguluko na yewa muntu. Abyo ibyo.

¹⁰³ Kabiji inge mwanamulume nangwa mwanamukazhi wakonsha kusenda dinominesheni popo ayimena, akyo kiswisha kutenda suki, kuvwala tuputula, kwipetapeta, ne byonse bintu bya musango yewa, kabiji ne kamusango kamo kacheche ka—ka lunengezho, kabiji ne byonse byubiwa, kabiji ne kuya kubibaza bya mapila, kabiji—kabiji ne byonse byabulamo maana, kabiji ne kuswisha byoibo; kabiji ne kutemwa bibye kukila musangowakala wa Kyambo kya Lesa akyo kichibaula ne kusongamo, ne kulenga bainetu kufuma mu banabakazhi, ne kwibatola ne kwibalengela ke bavwale bulongo ne kuuba byubilo byawama, batola tushiki ne fwaka, ne kuchipa kabiji ne kufing'ana, ne kubepa bubela kabiji ne kwiiba, kufuma kwi anweba, kabiji ne ntanda yonse kufuma mwi anweba, ne kwimupa Kintukimo akyo kipwisha kulumbuluka. Kika banabalume nangwa banabakazhi kyo bayila kubyoibo bintu na kukeba kumvwa bulongo? Mwakonsha kumvwa byepi bulongo kufuma mu bibye?

¹⁰⁴ Mwakonsha kutana byepi byakutoma bipya kufuma mu mushima wa nshikama? Kika muntu kyo. . . Inge muntu waya ku mushima wanshikama na kukeba kutoma, kasa kuji nsulo ya mushima itupauka yashikulwa, mwakonsha kwaamba mba, “Pajipo kintu kimo kyatamako mumilanguluko ya yewa muntu.”

Kabiji umvwe mwanamukazhi nangwa mwanamulume waya kuyoya puzha na kukeba buwame, nishi kujipo kintu kimo kyatama kya bumupashi. Abo kechi bakeba Kyambo ne. Kimweshatu mba musangowabo ukijitu bombwe, nangwa kivube, nangwa kitutu kimo, akyo kijitu bulongo, kintukimo kya muyewa musango kyatemwa kizhiba kyanshikama, mambo abya bintu kechi byakonsha kwikala mukizhiba kya Meema- apya. Abo kechi bakonsha kwikyuba ne; ke Meema apya. Abo kechi bakonsha kwikyuba ne.

¹⁰⁵ Pano, kwijizhanya kwajinga ke, “Bekishiile Kyee.” Kabiji ne leelo bauba kintu kimo.

Pano talai pa mwanamukazhi pa mushima. Kyawama, waishile ku mushima wakwa Yakoba, kabiji watapulanga meema kimye kyonse kokakwa, ku mushima wakwa Yakoba. Bino mushima wakwa Yakoba, dinominesheni, byo twakonsha kwikitela, mambo aye wapoyile isatu; kabiji ne yuwe ye wapoyile. Bino, wajinga najishimikila jabaya bingi. Aye waambile mba, “Bino, shetu wapoyile yuwe mushima, Yakoba. Aye watomenenga monka, kabiji ne bang'ombe banji

batomenenga monka, kabiji ne byonsetu. Bushe akyo kyawama bulongo nyi?”

¹⁰⁶ Aye waambile mba, “Bino meema omutapula kufuma kuno, mwikala nakilaka jibiji, mukakeba kubwela kuno pa kuuba mba mwiatapule. Bino,” waambile mba, “Meema opana Amiwa ke Nsulo, ke Nsulo ilupula meema akaba kufuma mukachi, kabiji kafwako kwiya kuno na Kwikitambula ne. Kijitu pepi ne obewa.”

¹⁰⁷ Monai. Bino byo ayukile mba Nsulo ya Bumupashi yaamba kwi aye, kupichila mu kiyukilo Kyanembwa kyonka kyo apembejilenga, aye washile aya ndonda ya dinominesheni yakwa Yakoba kabiji kechi wabweleleko jibiji ne, mambo aye wataine Jibwe jiine. Mwamona? Aye wanyemeyile mu muzhi. Aye bubu bwanji bwapwile. Aye kechi wakijinga mwanamukazhi wabilubo ne. Aye waambile mba, “Iyai, mumone Ao ye Natana, Mwanamulume wambula bintu byonse byo Naubile. Bushe Awe kechi iye Kilishitu nenyi?” Aye. . . Awa mushima wafwayijilwe kwikalatu bulongo; waingijile mwingilo wani. Pano aye wajinga pa Nsulo ya kine. Awa mushima wajingatu bulongo poso aya Nsulo yakine ya shikukile. Pakuuba Nsulo yakine byo yaishile, awa mushima watayile bulume bwanji. Aye wataine mba kuji puzha yawama ya kutomamo.

¹⁰⁸ Kibiji kuji puzha yawama. Kuji puzha yawama, kabiji amo ke mwi Kilishitu. Mu Yoano Wazhila 7:37 ne 38, Yesu waambile mba, pakijiilo kyapelako kya mimba, “Umvwe muntu umo waumvwa kilaka, mulekai eye kwi Amiwa, kabiji ne kutoma.”

Abo bonsetu basangalelenga. Bajinga na kacheche kakutaya meema kufuma mushi ya kitapisho, kabiji—kabiji akwa binse batomenengatu kufuma mukikye, mu kusekelela, kwa—kwa kijijilo. Kabiji waambile mba, “Bashetu batomenenga kufuma ku jibwe ja bumupashi amwa mungyetu.” Monai, abo besongejile abo bene mushima, meema obampopele anshikama kufuma kuntu kumo, kabiji ne kutaya meema monka mu tempo moomwa. Kabiji abo bakonsheshe kuzhokoloka ne kutoma, ne kwaamba mba, “Myaka yapita, bashetu batomenenga mungyetu.”

Yesu waambile mba, “Amiwa ne Jibwe aja jajinga mungyetu.”

Waambile mba, “Tuja manna kufuma Mwiulu, kabiji Lesa wianonkeshenga.”

¹⁰⁹ Waambile mba, “Amiwa yami Manna.” Aye, aya Nsulo, yaimenenga mukachi kabo. Awa Shinkwa wa Bumi waimenenga mukachi kabo.

Kabiji nangwa byonkabyo kechi bekikebelenga Akye ne. Abo bakonsha kutemwako kwikala na mushima wabo; mambo, muntu ye walenga *kikye*, kabiji Lesa watumine *Kyokya*. Alo lo lwine lupusano. Kwimpyoyila abobene mishima!

110 Aye waambile mba, “Inge muntu waumvwa kilaka, mulekai eye kwi Amiwa, ne kutoma.” Aye yoyoya Nsulo.

Kabiji monka mwaambila Binembelo mba, “Munda yanji mukafumanga mikola ya Meema abumi.” Oo, Aye yeyewa mushima utupauka meema! “Munda mwanji mukafuma, nangwa mukachi ka bumuntu, mukafuma mikola ya Meema a bumi.”

111 Ye joja Jibwe, aja jajinga mu. . . Aja jajinga Jibwe jakwa Hagela, mu kimye kya makatazho; kimye mwananji po ajinga pepi na kufwa, byo bamubikile pangye ya kambi, kabiji wajinga kokwa na Ishimela wamuचेचे. Meema anji, mu mushima wanji ye asendele, apwile onse. Kabiji aye wamulajikile Ishimela panshi; kabiji wayile, wakunamijile panshi, kabiji wajijile, kabiji, oo, mambo kechi wakebelenga kumona mwaana kufwa ne. Kabiji ponkapotu, Malaika wa Nkambo waambile, kabiji wataine Mbe- . . . Mbeleshemba, awa—awa mushima ao wapichilenga, kabiji ukipita ne buji leelo. Aye wajinga Mbele-Mbeleshemba wakwa Hagela, Jibwe jajinga moomwa mungye.

112 Jaimene pano mu Nsulo yayula na Mashi, aja juba, wayimene momwa mu kipwilo. [Kafwapo kijipo pa tepu ne—Waku]. . . mu kimye kya kikukwila. Mu Zakaliya kyapitala 13, Aye wajinga yoya Nsulo ya shikukile mu nzubo yakwa Davida, ya kutoksha, kabiji yajinga (bubi) ya kutoksha bubi. Aye wajinga yoya Nsulo. Kabiji mu ma Salamo 36:9, Aye wajinga yoya Nsulo ya Bumi. Aye ukijitu aya Nsulo mu nzubo yakwa Davida.

Kabiji Aye wajinga wakusapaula, mu muchima wanji momwa. Wakusapaula waambile mba:

Kuji Nsulo yayulamo Mashi,
Afuma mu mishipeshipe yakwa Emanuele,
Akufyamamo bamambo,
Bundenga mambo bwabo bonse bupwa.

Aye yoyoya Nsulo ya Bumi, Nsulo ya Meema. Aye ye Kyambo kya Lesa.

113 Bantu ba muano moba akupelako bamukaana Aye, Kyambo kyakine, Meema a Bumi; kabiji be songela abo bene mishima ya kidinominesheni; kabiji, ne jikwabo, besongela, bapooya!

114 Kabiji pano twatana kuuba mba, bajinga na mishima yalajika. Kabiji pano awe mushima wayula na tulongolo twabula kwitabila, bakwitota babulamo lwitabilo, mitachi ya kufunda, ne bikwabotu, abyo byapusanako na milaye yakwa Lesa. Abo ke bakuzhinauka Kyambo.

115 Bino, aye mishima yo banji nayo, Baibolo waamba mba, byajinga bya “lajika.” *Walajika* mushima ke mushima “usuuma”, kabiji ubena kunonka. Kibena kuubaka? Kibena kunonkela mukimbo kya ndochi kya bupompweshi kyatelwa mba Kinje kya Ntandayonse kya Bipwilo. Kabiji ako awe mushima walajika

koabena kwibatwala, byonse ke mambotu bamukana Aye, kabiji banji . . .Nsulo ya Meema a bumi; kabiji ne kulenga aye mishima.

¹¹⁶ Kupoya ndonda ikatampe yakufunda, funjilo, ne bikwabotu. Ayo yomisango ya mishima yobabena kupoya leelo, muntu wafwainwa kwikala na Ph.D., nangwa LL.D., nangwa na Digili mutanshi Wabusendwe, nangwa kintu kimo, kasa akyangye ne kutatula kusapwila. Mishima ya yuzhiwamo na masukuulu andengelo-yabantu. Bebatwala mu masukuulu akatampe akufunjilamo, kabiji momwa bebabikamo na byabo bya masukuulu a lengwa-nabantu, kabiji bebantuma nabyobyoy. Ngaajo juba jotubena kwikalamo, mishima yalengwa-nabantu! Kechi pajipo lukatazho . . . Oene mambo akye kintu kyayikalatu ke—ke kinuka, oo, ami, ke mambo akuuba mba bantu babena kutomamo.

¹¹⁷ Kabiji bantu umvwe babena kukeba lusekelo leelo, boba kika? Bantu, mukifulo kya kutambulako lusekelo lwa Nkambo, balulukila ku bubi, kupingakenya mulusekelo. Bantu baya ku kipwilo ne kwaamba mba twiiba kalume bakwa Kilishitu, inge baikala na lubazhibazhi bakonsha kwambula kashiki kafwaka. Kabiji umvwe ba—umvwe bakeba ku—kukayapo, bekala mu byakumvwala byabo bya bubi kabiji baya na kuchiba nsono umvwe muntu ubena kuya kulutwe, pa kuuba mba bajizhenga milozhi. Abo bakonsha kuuba kiji kyonse mambo akukeba kwikala bayukanyikwa. Bakeba kwikala nobe boba bakaya ma filimu. Alwa lo lusekelo lwabo.

Kimye, Yesu kyo aambile mba, “Amiwa yami kufikilamo kwabo.”

Ene mambo kyo baila kukyokyo, mambo kechi bakeba kutoma ku yoya Nsulo ne. Abo be Ikana. Abo kechi bakeba kutoma kwi Akyo ne. Abo bene benunga kumusango wa tachikilo yalengwa-nabantu, musango wa mushima ao wayula na misango yonse ya bintu byanshikama, amba bakonsha kuya byonkabya.

¹¹⁸ Keesha, twajinga baana babacheche kumukola. Naketekela kyajinga pa Kibelushi lukeelo. Twayileko; Billy walobelenga kasa anji mubwato. Kabiji twasendele banyike, bankana bami ne bakwabo, mwaanami wamukazhi, kabiji ne mwaanami wamulume wa mucheche, kabiji twayile kumukola na—na kupitang’ana mubwato. Kechi wakonsha ne kupitanag’ana na bwato ku mukola ne, mambo abusanji, dochi, bantu babi ponka pa mukola, banji kichika bwamba kabiji ne byakubauba. Bwato bwayilenga kulubaji lwetu, jibumba ja banyike twelufu-, ba songwalume-bamyaka-fotiini, umo yense uji na kikopo kya maalwa mu kuboko kwanji, ne fwaka. Batela kyokya mba “kisangajimbwe.” Oo, ami! Ino ntanda yakonsha kwikala bimye binga, na byubilo nobe byobya?

119 Nanchi ke kwikasulula abo bene kumilanguluko mba inge bafwa bakaya ku ngehena, bintu byoboba, baya na kutwela mu yiye mishima yalenga-bantu. Kyakuuba mba musangotu wabantu bamo bobatanwa mu yewa mushima. Kafwako ke jibumbu ja bantu babiko, bilongolo byamikila-biminyangala bya bubipisho bwa ino ntanda. Kabiji ne abo bene belamikatu kukikye mambo, nobe byonka byaambanga bamaama bakote amba, “Bang’onyi ba mayona amo bendela pamo.” Abo kechi bakonsha kwiya ku Nsulo amba batokeshiwe kufuma kubobwa bumi bwa bubi ne. Basaka kwikala momwa, ne kutwajijila kwikala nalushimuno amba twi Benakilishitu. Kika? Abo bafutuluka kufuma kwi Aye, aya Nsulo ya kine yalusekelo, Bumi, Bumi bwa lumbuluka kabiji bwafikilamo. Ao oene mambo kyo bekyubijile, mambo abo bakeba kukwatakana nabo. Banji namusango wa bantu mukachi kabo baketekela mu byobya bintu.

120 Kuno kechi papita moba avula ne, Mulongo Fred ne Amiwa, kabiji ne Mulongo Tom, jibumba jetu jayile ku kipwilo kyayukanyikwa kya Baptist mu muzhi wa Tucson, nakumona inge twakonsha kutanapo kakintu kacheche kakonsha kwitupako ng’umvwino yawamako. Kabiji wamwingilo waambilepo kintu kikwabo pa bantu bajinga mu Ijipita, amba byo bafuminemo bajilengatu galiki ne bintu bikwabo, bakebelengatu kubwela jibiji na kuja byonka bya. Waambile mba, “Akyo kijintu pamo nobe bantu ba mu buleelo.”

Kabiji, atweba, muntu yense waambile mba, “Amena!” Amiwa kechi nakimonapo jibumba ja musango yewa ne! Kipwilo kyonse kyalekele kumona musapwishi ne kutalatu kunyuma na kukeba kumona waamba mba “amena.” Kyamwekele nobe kwibachinyisha kufika nekulufu. Abo kechi bayukile kana kyajinga kika ne.

Kimye, Davida kyoambila mba, “Pangai kyongo kyalusekelo kwi Nkambo. Mutakaikai Aye pa byansa! Mutakaikai Aye na misakayi! Lekai kyonse kiji na muuya kitakaiki Nkambo. Kabiji mutakaikai aye Nkambo!” Lesa usekela mu bantu Banji. Lekai bafunda bambe, mba, “Amena,” umvwe kintu kyaambiwa mo kyaitabilwa.

121 Kika kyakubula kufuminako ku tachikilo ne mishima ya ntanda, ne kuya kumutachi wakishika wakwa Lesa, awo ke mushima wa nsulo itupauka, Yesu Kilishitu? Kika kyakubula kwalulukila kwi Aye, ako Lesa koapana lusekelo lwavula, kuvula kwetu kwakupewa mu mitotelo, kupewa kwetu kwavula kwafikilamo? Butekanye bwa mishipeshipe yami bufuma kwi Lesa.

Umvwe Natabaulwa, Ntana buwame bwami mwi Kilishitu, kechi mu kasanga ne, kechi mu bintu bya muntanda ne, kechi mukunungankana mu mafunjisho akipwilo ne; kana kupichila

mu Kumutaana, Kyambo kyalailwe kyo Aambile mba, “Inge Naya, Amiwa kabwela jibiji na kwi mutambula.” Ntana lusekelo lwami mu kyokyo. Aye ye Lusekelo lwami.

¹²² Baamba leelo, pa kutwela mu bibye bintu kabiji ne pakulenga akye Kinje kya Ntandayonse kya Bipwilo, amba bakalenga ntanda yawama ya kwikalamo. Mwayila milanguluko yami yabukishika, bakalenga ntanda yawama kubilamo bubi. Ako ko . . . Byosetu ke bubi, nangwatu byepi; kechi kwikalamo ne, kana ke mwakufwila. Kulenga puzha yakyo mwakwikala, nangwa, kubilamo bubi, mukifulo kyakwikalamo.

¹²³ Kintu kikwabo kyonse, kiji pangye ya Yesu Kilishitu ne Kyambo Kyanji kya Bumi, ke mushima walajika. Kintu kyonse kyeseka kupingakenyamo Kintu kingi; kintu kyonse kyo mwakonsha kuuba pakuba mba mwikale na mutende, kyonse kintu kyo mwakonsha kuuba amba kimuletele lutekenesho, musango uji yense walusekelo ye mutambula kufuma kukiji kyonse, nobe kyakupingakenya Mukikye, ke mushima walajika wayula biko. Aye upana buwame bwa lumbuluka.

¹²⁴ Navuluka kuno, bimye byapitapo kunyuma, Nalupukijile kunyuma ya kizhilo. Kwajinga mwanjike usekasekatu waambile kwi amiwa mba, amba, “Mwayuka, mambo ene kimye kyonse kyo mwambilatu pa banabakazhi muyewa musango, pakuvwala atwa tuputula kabiji ne bintutu bikwabo,” aye waambile mba, “mambo wi muntu mukote.” Waambile mba, “Ao oene mambo okyayikela byobya.”

Naambile mba, “Talai kuno. Uji na myaka inga?”

Amba, “Tweeti-sebeni.”

¹²⁵ Naambile mba, “Kimye kyo Najinga mwanjike na myaka yavula kukila obewa, Nasapwiji lenga kintutu kimo.”

Nataine Nsulo ya buwame. Aye ye lubaji lwami. Amena! Kikulutu Aye ubena kupana kyokyo, aabo bo buwame. Abo—abo bwami . . . Abo bwami bu sendwe, ke kutala kwi Aye, na kumona mingilo Yanji yakonsa kabiji ne kumona Aye byo abena kuuba. Kechi kujipo nsulo ikwabo yo Nayuka ne!

Oo, buwame bwa pichilo
Abo bwandengela ami kwikala watoka too;
Kechi kujipo nsulo ikwabo yo Nayuka ne,
Kafwako kanatu Mashi a Yesu.

Kuji Nsulo yayulwa na Mashi,
Kufuma mumishipeshipe yakwa Emanuele,
Akufyamamo bamambo,
Bundengamambo bwabo bonse bupwa.

¹²⁶ Mbena kwi mubula, kechi kujipo nsulo ikwabo yo Nayuka kanatu aya Nsulo. Yatonkeshe ami kimye kyo Najinga wabiko. Iindama watonkeshiwa, mambo Nakeba kwikala bulongo

Nakyo, ne kutoma ao Meema apya ayuzha mweo wami na lusekelo.

Nakonsha kubwela bingi panshi, kabiji ne kumvwa nobe kechi Nakonsha kutwajijila kuya...kuzhokoloka kukwabo, kechi wakonsha kuya kuji konse ne; nanchi Nakonsha kufukama panshi ne kubika munwe wami pa mulaye, ne kwaamba mba, “Nkambo Lesa, Anweba yenu bulume bwami. Anweba yenu buwame bwami. Anweba yenu byonse-mu-byonse.” Nakonsha kumvwa Kintukimo kibena kuselauka mukachi kami amwa. Nafuma mukachi kakyo.

¹²⁷ Nobe byo Napita pa myaka fiifite, Amiwa kabuuka lukeelo lumo, mwayuka byo kikala, kechi mwakonsha kufuma pamwanya na kulu kumo ne. Ami, kechi mwakonsha kwikyuba ne; kabiji muntu umo pa kibelo, na kukokosha, nangwa Billy ubena kumbula mba kuji lukatazho lwa bukijibukiji, kuntu kumo Konakonsha kuya. Kabiji Nalanguluka mba, “Amiwa Nakonsha kwi kyuba byepi?” Esekai kufumya kulu kumo.

Nalanguluka mba, “Anweba yenu Nsulo yayula na bulume bwami. Amena! Bulume bwami ne bukwasho bwami bufuma kwi Nkambo. Anweba yenu mushima wami utupauka meema! Anweba yenu bwanyike bwami! ‘Abo bapembelela pe Nkambo bakapewa bulume; bakapewa byapi nobe bya mpungu; bakanyema, kabiji kechi bankakoka ne; bakenda, kabiji kechi bakapungila ne.’ Nkambo Lesa, awe ye mwingilo wami, kuya. Amiwa naitwa kwimana pa kifulo kyamwingilo.” Kabiji mwayukatu kintu kitanshi, Kintu kimo kitatula kupanga kyongo mukachi kami.

¹²⁸ Juba jikwabo, monka mukapuzha kakacheche, Najinga napwijilo kukwe ku Topeka, Kansas; kwajinga songwalume, musapwishi wakyanyike, bamo bajinga batanshi kutundaika nyingijilo yami. Mulongo Roy, waikela papo, wavulukile puzha. Mukikye, mu iye puzha ikatape kokwa, kwajinga mu—mu... Awe wamwingilo wajinga mushi ya mutenge nangwa puzha, kibumba kyakumbanji kya mufyachile panshi. Awe mutemwe wamubiji wa mucheche wafwilenga. Jichima janji jalajikile. Leenda wanji wafumine mupuzha yanji. Kinemenezhi kyabaya kyamuponejile.

¹²⁹ Naikela ku kajo kakwiaula, naambilenga ku bakazhi. Naamble mba, “Mukazhami, mwayuka, inge Yesu wajinga pano, mwayuka byo Akonsha kuuba?” Naambile mba, “Byo atundayikile amiwa mumwingilo, ‘Naketekela kyokya Kyambo,’ aye watundaikilenga Kilishitu.” Kabiji Naambile mba, “Abwe ke bujimuku bwakwa diabola.” Naambile namba, “Inge Yesu wajinga pano, Aye wakonsha kuya na kumuteteka maboko Anji azhila. Awa songwalume wafwainwa kwikalatu bulongo. Ami kechi nasakamana ne nangwa umvwe jichima jaji jalajika. Aye wakonsha kwikala bulongo, mambo Yesu wakonsha kuyako

kasa ayukishatu bulongo Ayemwine Byoaji. Aye wayukile lwito Lwanji, Binembelo byajingatu bulongo, kumweshwa mwi Aye amba Wiyukile Byoaji Ayemwine, kabiji kechi ke. . . kechi pajipo nangwa luzhinauko ne. Aye wakonsha kumuteteka maboko Anji, ne kwaamba mba, 'Mwaanami, konsa,' wabwela wafumako ne kufumako." Kabiji Naambile mba, "Kechi kujipo bademona bavula mu kalunga kabafu ba kwipayaya awa songwalume ne, nanchi." Naambile mba, "Wakonsha kwikalatu bulongo." Bino Naambile mba, "Mwamona, mutemwe, Aye wajinga Yesu, maboko azhila akwa Lesa."

Naambile mba, "Amiwa ne ndengamambo. Nasemekelwe kupichila mu masongola. Ba taata ne bamaama bonse bajinga bandengamambo, kabiji Amiwa kechi-nawamapo nangwa pacheche ne."

Kbiji Naambile mba, "Bino mwayuka nyi? Inge Nkambo wakonsha nkupa kimwesho ne nkutuma kuyako, apo kikekala ke kyapusanako." Naambile mba, "Nakonsha kuya koka ne kuteteka maboko ami pe aye, wakonsha kufumapo pa yewa mwanya inge Aye wakonsha Kupa kimwesho."

¹³⁰ Popo Natatwile kulanguluka, "Nangwa byonkabyo, inge kyayikala kimwesho, nishi ke kika? Kiji ke mabokotu amo abiko abikwa pe aye, uu-uuu, muntu yeka umo ubena kumulombelela, maboko okatu amo abiko."

Pano Natatwile kulanguluka namba, "Amiwa yami tomesha Wanji. Nanchi, Lesa kechi umona ne. Aa Mashi ayewa Mololoke ayikala popa pa kyakusokelapo bitapisho; Ayikala ke akusashijilako amiwa. Aye ye kufikilamo kwami. Aye yo milombelo yami. Aye ye Bumi bwami." Naambile mba, "Kintutu kyakonsha kulengela kubika maboko ami pe aye, na lwitabilo, mambo Naikala na lwitabilo mu kyokya kimwesho. Kabiji kwakubula kimwesho, lwitabilo loka lutulumo lwa konsha kuuba kintutu kimo; nanchi kechi Nakonsha kwi langulukilapo kintu kimo amiwa mwine ne, kana kumulanguluka Aye amba ye byonse-mu-byonse. Aye ye Bumi bwami. Aye ye Watuma mumwingilo. Kafwako dinominesheni ya ntumine ne; Aye watumine. Aleluya! Naya mu Jizhina Janji. Nsaketeteka maboko ami pe aye." Nayileko kokwa kabiji na tetekele maboko payewa songwalume, kabiji abwa boka bufuku wayikele mu mbung'eno ya kupwila, wakonsa bulongo. Amena!

¹³¹ Oo, ee, Aye yoyoya Nsulo. "Kechi kujipo nsulo yo Nayuka ne. Kafwako kanatu Mashi akwa Yesu!" Amiwa ne unuka, Amiwa ne muntu wakumunyema, atweba bonse byotuji, bino kumeso akwa Lesa twi balumbuluka. Ye-. . . "Ikalai balumbuluka, byonka biji Shenu wa Mwiulu wa lumbuluka." Wakonsha kwikala byobyoby byepi? Mambo Awa walumbuluka ye witwimenako kookwa. Aya Nsulo iji koka pajuba pajuba,

ipya. Kechi kintu kimo kyanshikama ne, pakuuba kipya pajuba pajuba, ayo yomvwa bubi bwami bonse. Aye ye yoya Nsulo.

¹³² Pano mu kupezhako, Nakonsha kwaamba kikye. Kintu kyonse kyapusanako ku Kikye ke mishima yalajika, kabiji kikapwisha na kusumya byo mwabikamo; inge mubena kubika luketekelo lweni lonse, kimye kyenu kyonse, kabiji ne byonsetu, mukimo kya yoya mishima yanshikama. Yesu waambile mba yajinga mishima yalajika. Lesa waambile mba, “Byalajika, kabiji bakasumisha byonse byo mwabikamo.” Anweba kechi mwakonsha kutwajijila kuya nabo kulutwe ne, mambo bikasuma. Mambo Aye ye yekatu jishinda jakuya ku Bukine, ku Bumi, kabiji ne kulusekelo lwa Peenape, kabiji ye mutende Wapeenape. Aye ye Yekatu kabiji jo jokatu jishinda jakuya ku Kyokya. Oo, ami!

¹³³ Aya Nsulo ya Bumi ibula kukooka ye Yesu Kilishitu. Kika? Kabiji Aye ye Ng’anyi? Akya Kyambo, kyo kimotu; akya Kyambo, abwa Bumi, aya Nsulo, “ujitu pamo keesha, leelo, ne myaka yonse.” Awa waitabila kyakine, Ke lusekelo lwanji lwa kilapo, ke Bumi bwanji bwa kilapo. Kabiji buwame bwanji bwa kilapo ye Kilishitu. Kafwako ku poompa, kafwako kudoonsa ne, kafwako kukwatakana nabo ne, kafwako kulipila mali ne; ke kwitabilatu ne kukokoloka. Abyo byo Aji ku baitabila.

¹³⁴ Nobe shetu Abulahama; aye kechi wadoonsele ne, aye kechi wajinga wa kwijizhang’anya ne, aye kechi wasakamene ne. Aye wajinga na Kyambo. Aye washakamijile pa kyaji kya kwa El Shaddai. Kimye Abulahama byo ajinga na myaka aduleendi, Lesa wamumwekejile, ne kwaamba mba, “Amiwa yami Wabulume bonse.” Akye kyambo mu ki Hebelu ke *El Shaddai*, kyalumbulula mba, “aye Uji-Nakyaji.” “Kabiji wi mukote, ne bulume bobo bwapwa, bino lalatu mu kyaji Kyami ne kutambula bulume bobo kufuma ku iye Nsulo.” Amena! Kika kyo esungileko ayemwine? Ke mubiji mupya. Aye waikale na mwaana, mwi Sarah. Kabiji, pakupitapo myaka fiifite, waikale na baana seebeni na mwanamukazhi mukwabo.

¹³⁵ Oo, El Shaddai! Alo Lulayang’ano Lwakala lumwasha byo Aubile, Lulayang’ano Lupya lubulang’ana Aye byo akoba. Amena! Mu alwa Lulayang’ano Lupya . . .

¹³⁶ Pano paikala patoka, nanchi Nsakupelawizhako kabiji ne kwikileka ponka pano, mu kaminetitu kamo.

Nasaka kwaamba kikye kasa kyangye Kupwisha. Najinga na kyakumwenako kyawama kimye kimo. Amiwa napitang’enenga. Kabiji bantu bavula muno . . . Muno mu Georgetown, amwa mu Milltown, kwayikalanga, amwa mwine mu mitumba, nsulo. Wajinga mushima wa nsulo itupauka. Yatayanga pepi nobe ke—ke foolo- nangwa faivi-mafuutu akakola ka meema, kalupulangatu meema kimye kyonse, kabiji ne nsulo ikatampe yatanwangako. Kabiji kookakwa kwajinga byavula bya mubibye

binchi bya bipupu, mwayukatu, kabiji ne bintu byavula byameneneko, abya biji nobe bipupu-binuka bulongo. Kabiji, oo, Naumvwanga kilaka pakuuba mba kafike kookwa, oo, ami, kufika kuyoya nsulo. Kabiji Nalalangatu kukikyeye kintu kabiji natoma ne kutoma, na nayikala panshi kabiji nekutoma, na pembelela.

Kabiji mwaka pa mwaka Nayanga kuyiye nsulo imotu. Kechi yapwanga ne, kimye kya mashika nangwa kimye kyakusaloo. Kechi kya chimbanga mukimye kya mashika ne. Kuuba wachimbisha mushima utupauka ne. Oo, ine! Oo, ine! Amiwa kechi nasakamana nangwa kwikale—kwikale byepi mashika, kechi kyakonsheka kuchimbisha kyokya ne. Mwakonsha kuchimbisha mushima; mashikatu acheche akonsha kwi kyuba. Mwamona?

Pakuuba kintu kyonse kyenda, kiji na Bumi mwi akyo, kibena kwenda nakuzhokoloka. Kabiji kechi mwakonsha kuchimbisha Mushima wa nsulo itupauka ne. Nangwatu pekale mupashi wa kunyachichijila pa yoya puzha, awe Mushima aye kimye kyonse uji nabumi. Bumi buji pa yewa Mushima.

¹³⁷ Kabiji Namwene popa, Nayile koka kabiji Nakatomeneko, kabiji, oo, ami, ke meema apyatu! Kechi wakonsha kutako muchima ne, “Nakumya, inge Nafika koka, kana kyaleka kupita nyi?” Kitwajijilatu na kupita . . .

¹³⁸ Umo jimi wakala wambujile, mba, “Ba nkambo babalume batomangako.” Kabiji naambile mba, “Kechi kyakyumapo nangwa kintutu kikwabo ne. Ukijitu mushima umu, nakulupula kuya mu Mukola wa Blue.”

¹³⁹ Nalangulukile mba, “Oo, ami, ke puzha yawama bingi ya kutanako meema!” Naendelenga pepi nobe mailo umu kufuma mujishinda, kuya nakuffika kuyoya puzha, mambo kine yajinga puzha ya kutomapo. Oo, aa meema ajinga awama bingi! Oo, ami!

Nakonshanga—Nakonshanga kupita momwa mu kiselebwa, pano ke ku Arizona, Kilangulukatu pakikyeye, “Awa ke mushima wakukumya kookwa, inge Nakonsha kulalatu ku kyokakya!”

Nobe Davida waambile kimye kimo, “Oo, inge Nakonsha kutomako jibiji kufuma kuyewa mushima!” Inge wakonshatu kufika kokakwa!

¹⁴⁰ Kabiji Nayikele panshi juba jimo, kabiji Najinga na kintu kimo kyakusekesha kya mwekejile. Kabiji Naambile mba, “Kika kikulengela kwikala wasangalala kimye kyonse? Naketekela kwikala Walusekelo kimye kyonse nobe byonkabya. Kika, kechi Nakumonapo wayikala bulanda ne, kufumatu po Natapijile kwiya kuno. Kechi pajipo kintu kimo kya bulanda pe obewa ne.” Naambile mba, “Obewa kimye kyonse wayulwamotu na lusekelo. Wiwa kutolauka ne kubilauka kabiji ne kutwajijilatu. Kimye mashika nangwa kimye kya kisalo, kwatalala nangwa kwakaba, monse mokyaikela, obewa wayulatu na lusekelo. Kika

kikulengela . . .? Kika, kyokika? Mambo akuuba mba Ntoma mwi obewa nyi?"

"Ine."

Naamba mba, "Kyawama, kapepo tululu tutoma mwi obewa, kabiji wikitemwa bingi bulongo."

"Ine."

Naambile mba, "Kyawama, kika kikulengela kubilauka? Kika kikulengela kwikala wasangalala bingi? Kika kikulengela kimye kyonse kwikala wayulwamo na lusekelo?" Naambile, "Mambotu akuuba mba—mba bang'onyi batoma mwi obewa nyi?"

"Ine."

"Mambo akuuba mba Ntoma mwi obewa nyi?"

"Ine."

Naambile mba, "Kyawama, kika kikulengela kwikala wayulamo na lusekelo?"

¹⁴¹ Kabiji umvwe awa mushima wakonsha kwamba kwi amiwa, wafwainwa kwamba bibye: "Mulongo Branham, kechi mambo akuuba mba utomamo ne; Nasata pa kyokyo, kabiji nangwa mba pana ku bang'onyi. Amiwa pana ku uji yense usaka kutoma. Kintutu kyo wafwainwa kuuba ke kwiyatuna kuno na kutoma. Bino, kika kindengela ami kwikala walusekelo, kechi ke ami kuselauka ne, ke kintu kiji mukachi, na nkushijika ami. Ke kintu kibena kuselaula."

¹⁴² Kabiji abyo byokiji na bumi bwayuzhiwamo—Mupashi. Nobe byonka byaambile Yesu, Aye wajinga mu . . . Mwamona, Aye wakupele mishima yameema ibena kulupula kuya ku Bumi bwa myaka, ke nsulo itupauka, kutupauka kwa meema akaba atwajijilatu nakupita. Nangwa kipwilo kyonse kiji peulu nangwa panshi, ukijitu pa yewa Mushima.

Kika kyakutolela tachikilo yakala yaki dinominesheni kabiji mmushima, mwayula tulongolo ne bintutu bikwabo, kabiji ne kutoma pa byobya bintu bya nshikamana, umvwe mwayitwa kwiiya ku Nsulo, ke Mushima utupauka meema?

¹⁴³ Nalanguluka byo kyashijikilenga, kabiji nekutaya bintu byavula, ne—ne kupanga kyongo, ne kuseka, ne kumvwa lusekelo, ne kutoloka, kabiji ne kukaya na lusekelo. Kwatalala, kuji mvula; kwa kaba, kwa uma, kimye kyaalo kyonse byo kyauminenga, akyo kyatupaukilenga nobe byonka byo kyaubanga. Mambo kyajinga kyazhika, kyatwezha mizhazhi, kyayiya kulupuka kufuma mu mabwe.

¹⁴⁴ Oo, ndekai ngikale ku Kyakabuka! Tolai byonse byatachikilo byalenga—muntu byo mukeba, mishima yenu yonse yashinkama yakala, bino ndekai ngiye ku . . . nangwa mishima yashinkama. Bino, ndekai ngiye kuyiye Nsulo, ndekai ngiye koko ako ko Aji

wayula. Aye ye Lusekelo lwami. Aye ye Kyeya kyami. Aye ye—Aye ye Bulume bwami. Aye ye Meema ami. Aye ye Bumi bwami. Aye ye Lubuko lwami. Aye ye Mupulushi wami. Aye ye Mfumu wami. Byonse byo Nakonsha kukabila bitanwa mwi Aye. Kika kyo Nafwainwa kuyila kukintu kingi?

¹⁴⁵ Mulongo, nyenga, kuuba wayiya kuyiye Nsulo bufuku buno nenyi? Kuuba wikyuba nenyi, inge ukyangye kufikako, kuuba Wamutambula bufuku buno mu kimye kyo twakunyika mitwe nenyi?

¹⁴⁶ Mishima yalajika, ibena kusuuma, ibena kunonka, ntanda ibena kunonkelamo, biko kufuma mu bipaka ne mu mobatu akwabo. Kika kechi yuwe Mushima ne, abya baya bintu byonse kuuba byatanwamo ne, aye Nsulo ikatampe yayula na Mashi, kufuma mumishipeshipe yakwa Emanuele? Kuuba mwikitambula bufuku buno nenyi? Aye Nkambo etukwashe bufuku buno, mu kikye kyauma, ntanda ya kilaka. Nobe byonka byaambile ngauzhi, “Aye jo Jibwe mutanda ya kukooka.” Aye yo yooza Nsulo. Kuuba mwayiya kwi Aye bufuku buno nenyi, mu michima yenu, kimye kyo tubena kulomba?

¹⁴⁷ Taata Mutemwe Wamwiulu, kechi pajipo Nsulo ikwabo ne, kimye lwimbo po abena kwiimba, “Kechi kujipo nsulo ikwabo yo Nayuka ne; kafwako kanatu Mashi akwa Yesu.” Nasemekelwe kooka, Nakomena kooka; Nasaka kwikala kooka, kabiji ne kufwila kooka, kabiji kusangukile kooka jibiji, mu Kyeenyi Kyanji. Kimye kyonse, Nkambo, lekai ngikale mu Kyeenyi Kyenu, kechi pajipo mukwabo ye Nayuka ne. Kafwako mafunjisho akipwilo ne, kafwako butemwe ne; kafwako butemwe ne kanatu Kilishitu, kafwako mafunjisho a kipwilo ne kana Kilishitu, kafwako buuku ne kanatu Baibolo, kafwako kintu kikwabo ne, kafwako lusekelo pangye Yanji ne. Aye Mufumyai kwi amiwa, Anweba Lesa, kechi Nasakamana ne nangwa mwi Amiwa mwajinga ntanda byepi, kya—kyafwainwa kwikala kyafwa, Nafwainwa kupitang’ana namaboko ami asutulwa peulu ya mutwe wami. Aye Mufumyai kwi amiwa, Amiwa nkaya, Nkambo. Bino lekai Aye ekale mwi ami, nishi Kuvumbi wawamatu pamo ne Ndoolo, nanchi kechi kujipo mapuzha akaba ne kabiji kechi kujipo mapuzha auma ne, ne lwinetu lufu kechi lujipo na lushijilo ne. Lekai twikale Nanji, Taata. Aye Mupai, mu byavula, ku yense waitabila muno bufuku buno, byonka byo bapembelela mu kino kibamba.

¹⁴⁸ Bavula ba mwiabo basakwendeshanga pa mikwakwa bufuku buno, byo basakuyanga ku manzubo abo, kabiji aye yikale mumilanguluko yabo, “Amiwa mbena kwikala pa yoya Nsulo. Amiwa naikala popa, na kutoma kumubiji, awala pa awala.”

¹⁴⁹ Kabiji inge kechi batambulwila kyokyo ne, ne pano, bamutambule Aye ponka pano, nanchi bakonsha kusenda aya

Nsulo kuya nayo. “Amiwa nsakuya nenu; Kekale nenu kufikatu ne mpelo yatanda.” Nswishai abye bintu, Taata.

¹⁵⁰ Pano kimye kyotukiji na mitwe yetu yakunama, bushe mujipo umo muno nyi, bufuku buno, nangwa baanga bakonsha kwaamba mba, “Nkambo, twalayi kuyoya Nsulo ponka pano. Amiwa kechi najikwishila kuno na kutelekatu ne; Najikwiiya kuno na kukebapo Kintu kimo. Najikwiya kuno na kukeba Anweba, Nkambo. Amiwa ne mukabila Anweba bufuku buno. Iyayi mu muchima ponka pano. Musakwikyuba nyi, Nkambo?” Lesa emupeshe. Aye Nkambo emupeshe umo umo.

¹⁵¹ Taata, Anweba mwamona maboko, asutulwa peulu kabiji azhokoloka kibumba kyonse, kabiji ne mubibamba bikwabo, biji pangye. Anweba—Anweba mwi bamona, Taata. Na—Nalomba mba Anweba musakupana byonse byo babena kukeba. Kapepo bajikutomanga pa yewa mushima wakala, Nkambo, ke kwimanakotu pakachi-napakachi apo muntu umo wasonga mushima, kikala kyayulwamo na misango yonse ya mafunjisho abula kuyukanyikwa, kukana Kyambo. Nalomba, Lesa, amba bufuku buno basakwiya kwi Aye Uji yoya Nsulo, aya Nsulo ya Bumi. Kiswishai, Taata. Nebipana kwi Anweba pano mu Jizhina ja Yesu.

¹⁵² Kabiji Anweba mwambujile, “Inge mwayipuzha kintu kiji kyonse mu Jizhina Jami, kikobiwa.” Bino, kechi Nakonsha kwipuzha kikye ne, Nkambo, inge kechi Nalanguluka amba byakonsheka kubiwa ne. Amiwa na—Amiwa nakonsha kwikyaambatu nobe kisho. Bino Nebalombelela, na muchima wabukishika. Nebalombelela, naketekela mba Anweba musa kunswisha akya Kyomwalayile.

¹⁵³ Kabiji pano Nebatola kwi bafumya kuyewa mushima bufuku buno. Nebatola kwi bafumya pa kifulo po babatomenga, apo po babula kutondwa; kwiya ku iye Nsulo. Nekyubila mu Jizhina ja Yesu Kilishitu.

¹⁵⁴ Abo ke Benu, Nkambo. Lekai batomenga kwi Anweba, Meema abumi, Nsulo ya Meema a bumi. Mwi Yesu Mujizhina, Nekipuzha. Amena. Kinswishai, Nkambo.

Oo, buwame bwapichilo
 Ao atokesha too;
 Kafwako nsulo ikwabo yo Nayuka,
 Kanatu Mashi akwa Yesu.
 Kika kyakonsha kungovwa ubi bwami?
 Kanatu Mashi akwa Yesu;
 Kika kyakonsha nkupa bututulu jibiji?
 Kanatu Mashi akwa Yesu.
 Oo, . . .

Yesu, bukai babo, Nkambo! Kinswishai, Nkambo, kupichila Mujizhina ja Yesu. Nalomba, Lesa, amba Anweba...?... Anweba mwayuka bintu byonse.

Kafwako nsulo ikwabo yo Nayuka,
Oo, kanatu Mashi akwa . . .

¹⁵⁵ Nekilanguluka kye, kafwako nsulo ikwabo yo Nayuka!
Amiwa kechi Nayukapo kintu kikwabo ne kanatu Aye. Amiwa kechi nkabila kuyuka kinu kikwabo ne kanatu Aye. Kafwako kanatu Mashi akwa Yesu! Oo!

Oo, buwame bwa pichilo
Ao atokesha too;
Kafwako nsulo ikwabo yo Nayuka,
Oo, kafwako kanatu Mashi akwa Yesu.

¹⁵⁶ Mukimye kyo tubena kwimba jibiji, twayai twiyimune maboko umo ne mukwabo. Bushe mwitemwa anweba bene nabene nyi? Mujipo umo muno uji na kintu na mukwabo nyi? Inge koaji, yayinga muwamishepo. Musakwikyuba nyi? Kechi tufume muno muye musango ne. Mwamona? Inge mujipo nakintu kimo na muntu umo, yayinga mukawamishepo, ponka pano. Ponka pano kyo kimye kyenu kya kuyaako, amba, “Mulongo, nyenga, Naambilepo kintu kimo kwi obewa, Nalangulukilepo kintu kimo. Amiwa kechi natazhizhe mukuuba kyokyo ne. Ndekelaiko mambo.” Monai, ajo jojishinda ja kwikyubilamo. Twayai twikale na Nsulo ponka pano mukachi ketu, mukimye kyonse. Mwamona?

Kafwako nsulo ikwabo yo Nayuka,
Kafwako kanatu Mashi akwa Yesu.
Oo, buwame bwapichilo
Ao atokesha too;
Oo, kafwako nsulo ikwabo yo Nayuka,
Kafwako kanatu Mashi akwa Yesu.

¹⁵⁷ Oo, Aye kechi wakukumya nenyi? Kafwako nsulo ikwabo ne! Atweba kechi tusakwisombesha atweba bene na bintu bikwabo ne. Atweba twaabama, twasha ntanda panyuma. Atweba kechi tukeba byakuja bya mu Ijipita kabiji ne mishima yalajika ne. Atweba tuji palwendo ne Nkambo Yesu, aja Jibwe jo bapumako, amena, kuja Manna kufuma Mwiulu, kabiji ne kutoma; kuja Kajo ka bampungu, kabiji ne kutoma kufuma ku Jibwe. Amena!

Kafwako nsulo ikwabo yo Nayuka,
Kafwako kanatu Mashi akwa Yesu.

Pano twayai tukunyiike mitwe yetu.

¹⁵⁸ Nalomba mba Lesa emupeshe bingi anweba bonse, amba lusa Lwanji ne bupe bikale ne anweba kupita mu mulungu yense ubena kwiya. Kabiji inge kintu kimo kyamweka, amba umo wa mwianweba wakonsha kupita mubunshiya bwa kipembe, yukaitu amba ke maawala achechetu a kulala tulo ne kukokoloka poso byo tukasambakana. Vulukai, mba, “Aba bakatanwa bomi ne kushalapo kechi bakatangilapo ne kusha aba balala mutolo ne, mambo Tolopita ya kwa Lesa, aya

Tolopita ikapelako...” Ya busikisi popo yavumatu. Kabiji aya Tolopita ikapelako, nobe Katetesho kapelako, kikekala ke Kwiiya kwa Nkambo. “Ikavuma, kabiji ne bafu ba mwi Kilishitu bakasanguka patanshi.” Babena kukokolokatu poso kufika mukyokya kimye.

¹⁵⁹ Kabiji umvwe wakozhiwa kumuchima, vulukai:

Yanga Najo jakwa Yesu,
Jojikebo jobe;
Mukimye kya meseko,
Kejitele Jizhina jazhila mu milombelo.
(Bademona bakanyema.)

¹⁶⁰ Vulukayitu, twaketekela kwi mukumanya kuno pa Mulungu lukeelo. Mukalete ba kolwa ne bamanyikwa. Amiwa nkemulombelelanga. Anweba ndombeshaipo. Musa kwikyubanyi? Ambayi mba, “Amena.” [Kipwilo kyaamba mba, “Amena.”—Waku.] Nkemulombelela anweba, amba Lesa akemupeshe.

... Jizhina mu milombelo.

Jizhina Jawama, Jizhina jawama, Oo byo
jawama!
Luketekelo lwa ntanda ne lusekelo lwa
Mwiulu;
Jizhina Jawama, Oo byo jawama!
Luketekelo lwa ntanda ne lusekelo lwa
Mwiulu.

Pa Jizhina ja Yesu nakufukama,
Kuponena kumaulu Anji,
Mfumu wa bamfumu Mwiulu tukamuvwika
Aye,
Lwendo lwetu byo lukapwa.

Jizhina Jawama, jawama Jizhina, (kechi ja
wamisha ne kuwamane?)
Luketekelo lwa ntanda ne lusekelo lwa
Mwiulu;
Jizhina Jawama, jawama Jizhina, Oo byo
jawama!
Luketekelo lwa ntanda ne lusekelo lwa
Mwiulu.

¹⁶¹ Kimye kyonse kikala kyakosa pakuuba mba ne mushe. Nagwa Nayuka mba anweba mubena kutema mujilo, bino pajitu kintu kimo akyo...Twayai, veleeshitu umo wa kintu kimo, musakwiyuba nyi? [Kipwilo kyaamba mba, “Amena.”—Waku.] Musakwiyuba nyi? *Kipeshiwe Akya Kyakasa Pamo*, nyenga. Baanga bayuka awe lwimbo wakala? Atweba twamwimbanga, myaka yapita kunyuma.

¹⁶² Kabiji Nakulangulukanga, bufuku buno, “maboko abiji, kafuma pa maaduleendi, abo betusha,” kimye kyo twayimbanga awo lwimbo pa tabbanako, kabiji ne kwikwata kumaboko etu. *Kipeshiwe Akya Kyakasa Pamo*. Amiwa nanzhika bavula bingi bamwiabo, monka muno kubilende. Abo babena kupembelela. Amiwa kebamona jibiji. Nebamona, jimo pakimye, mu kimwesho, inge Natala kubunshiya bwa kipembe. Kobanji.

Twayayi tukunyike mitwe yetu byo tubena kwimba.

Kipeshiwe akya kyakasa pamo
 Michima yetu mu butemwe bwa
 Bwinakilishitu;
 Muluvwang’ano . . .
 Kiji pamo nobe popa Peulu.
 Kimye atweba . . .

Pano tanyikai kuboko kwenu ne kukwata kuboko kwa muntu umo.

. . .kwabana ne,

Pano kunyikai mutwe wenu.

Kitupa misongo ya mukachi;
 Bino tukekala bakwakatakana mu michima,
 Nakatekela kusambakana jibiji.

¹⁶³ Namitwe yetu yakunama. Napana kutangijila ku ba kafunga pano, kabiji nekwitulupula mu . . .



MISHIMA YALAJIKA KDE64-0726E

(Broken Cisterns)

Ino Mbila na Mulongo William Marrion Branham, yalupwilwe patanshi mu Kizungu pa Mulungu mabaanga, Makumbikumbi 26, 1964, ku Branham Tabernacle mu Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org